

浦江方志

第四期

史志中记载的浦江江溪泉水利专辑



浦江方志
第四期

史志中记载的浦江江溪泉水利专辑

浦江县地方志编纂室

浦江县地方志编纂室
二〇二〇年三月

封面题字：何保华




浦江方志

第四期

史志中记载的浦江江溪泉水利专辑

浦江县地方志编纂室

二〇二〇年三月



总第四期

主 编：张伟文
副主编：金月红
编 辑：贾剑挺 周凌莉
石有才



主 办：浦江县地方志编纂室
地 址：浦江县人民东路40号
电 话：0579-84125531
邮 箱：pjxxzb@163.com

目 录

一、江	001
二、溪	010
三、源	025
四、潭	031
五、滩	034
六、泉	035
七、塘	045
八、堰	050
九、井	057
十、涧	058
十一、水利	059
十二、桥梁	074

附录：

1. 浦阳十景	151
2. 舆图	175
3. 乡井	176



一、江

浦阳江

《嘉靖浦江志略》：一名浦阳泖。源出县西深袅山，东流五十里，绕县郭之南。又百余里，入绍兴诸暨境始通舟。又二百余里，经越之钱塘入于海。县名盖取诸此。

浦江本吴越三江之一。《春秋外传》所谓“三江环之者”是已。江水虽微，而与吴淞、钱塘并称者，独入海也。潜溪宋氏曰：“浦江壤地虽不越一百里，仙华山拔地而起，奇形俛观，如旌旗，如宝莲华，如铁马临关，而大江之水又如白虹，蜿蜒斜络乎其前。实天地间秀绝之地也。故人生其中，多以文学知名。”今考之《浦阳人物记》，其言信不诬矣。呜呼！山川清淑之气钟于人者，亘古今不息也，而今若寥寥焉。邑之人士均得是气，以生者其尚，勉继前修，以无负于山川之胜哉。则志之之意也。

《光绪浦江志稿》：《旧志》：去县南一里许。其源出县西深袅山中。按：深袅溪为江之旁源。井坑岭水实为正源，路亦较长十余里。旧志不足据。东流三十余里，绕县郭之南复东注，逶迤百余里，入绍兴诸暨境，始通舟。又绵延二百余里，以入于海。

附：

秋日泊浦阳江

唐 杜荀鹤

一帆程歇九秋时，漠漠芦花拂浪飞。
寒浦更无船并宿，暮山时见鸟双归。

照云峰火惊离抱，剪叶风霜逼暑衣。
江月渐明汀露湿，静驱吟魄入玄微。

冒雨渡浦阳江

宋邑人 方凤

痴云千顷压江堦，寂寂篮舆破午烟。
树杪楼台看近郭，渡头波浪忽滔天。
舟依曲港难回楫，径转高陵每得筇。
谁向龙山夸海国？一声铁笛女墙边。



赠浦阳江渔者

明 郑棠

浦阳水，清接蓝，仙华蜿蜒走其北。二水会合城东南，朝霏紫翠暮霭晴岚。水光山色日万状，渔歌钓艇浮千潭。欸乃一声秋月皎，粼粼百顷玻璃涵。衣冠相承风朴美，高韵雅有奇才男。粲粲珠玑每酬唱，霏霏玉雪高清谈。结屋江之浦，酿酒泉香甘。清风一联长在手，垂杨穿得渔鞋纤。有时取醉藉芳草，红光八面春容酣。一朝徵书自天下，天衢逸足驰飞骖。凤池纵挥洒雨露，恩光沾云汉天章。五花诰元霜鹤管，濡银蟾笔精墨妙。古书法鸾翔，凤翥宿所谕。闲来过我官舍冷，堆床图史交相参。墨池染翰翻鲸浪，芸窗响榻高掀帘。长吟却忆江渔日，桃花浪暖春波恬。竭来旅寓京华久，清梦夜夜归门阖。东观好事为图写，历历景趣存缃缣。会当铁网掣起珊瑚树，平步直上瀛海三山尖。按：江文通有“昨发赤亭渚，今宿浦阳汭”，李白有“涛落浙江秋，沙明



浦阳月”之句。

《明史·地理志》：浣江即浦阳，亦曰青弋江。《绍兴府志》：钱清江系浦阳江下流。浦阳江，其源出金华府浦江县，北流一百余里入诸暨县，与东江合流，至官浦浮，于纪家汇东北过峡山，又北至临浦，注于山阴之麻溪。北过乌石山为乌石江。又北而东至钱清镇，则名钱清江。又东入于海。今开碛堰以通上流，塞麻溪坝以防泛滥，而江分为二。《新绍兴府志》：旧志注云：“浦江一源分为二派。”其说实非，乃是二源二派也。谓“曹娥未溺之先，其江亦名浦阳”，得之矣。按：今嵊县之西南与义乌接界，义乌之西与浦江接界。两接界处，其山自东而西，驰水分八字：山阳之水入嵊，为曹娥；山背之水入诸暨，为浣江。浣又分而为二：一达山阴之钱清，由白洋入海；一达萧山之临浦，由钱塘入海。此实迹也。今之义乌与嵊县接界处，旧必隶浦江，后析入义乌者。故曹娥江亦名浦阳耳。

按：“一源二派”，乃指江之发源深袅山，经诸暨，一由钱清入海；一入浙江，同归于海者也。“二源二派”，乃指今义乌、东阳之间，万壑所趋，源分南北：一入嵊，为曹娥；一入诸暨，为浣江者也。二说判然不同。若专指深袅一源，与曹娥旷隔百里，脉络不通，而曹娥之亦名浦阳江，诸书确凿。其说何居？其为“二源二派”之说者，则又仅以山阳、山背言之，置深袅于不论，何其疏略也。今合而参之。酈道元《水经注》谓：“浦阳江导源乌伤。”考唐武德七年始改乌伤为义乌，垂拱二年复分县地置东阳县，天宝十三年又为分县地置浦江县。道元系北魏人，在唐以前，所称乌伤，乃统指今之义乌、东阳、浦江三县之地而言，其发源不一，故



派亦殊途，未容举其东而遗其西也。又《诸暨志》：引章大修之言，谓“嵊县西南与义乌接界。”考《义乌志》：东南到东阳县界五十里，谓义乌未分东阳以前与嵊县接界则可；既分以后，义乌、嵊县之间东阳间之，何云接界哉？又谓“义乌与嵊县接界处，旧必隶浦江，后析入义乌者，故曹娥江亦名浦阳”，此更失考。闻以义乌析入浦江，未闻以浦江析入义乌也。总之，义乌之水，其发源于今义乌、东阳之境者，一入嵊为曹娥，一达诸暨为浣江，断无可疑。而浦邑深袅发源之水，亦入诸暨会合为浣江。浣江又分为二：一入钱清，一入浙江耳。义乌、浦江、东阳，唐以后虽分三县，在道元时都属乌伤，故曰“浦阳江导源乌伤”。其源同县，故江亦同名。章大修未究其源，以致莫穷其委，遂疑曹娥不在浦邑境内而亦以“浦阳”称，或因浦江析地之故，真臆说也。

明张元忭《浦阳江考》：《嘉奉会稽志》曰：“《禹贡》三江既入，震泽底定。”韦昭云：“三江者，松江、钱塘江、浦阳江，盖江之名尚矣。”《越绝》云：“浦阳者，越王句践兵败，众溃于此，故曰浦阳，去山阴五十里，今土人以钱清为古浦阳也。”此指浦阳江之经诸暨由钱清入海者。酈道元《水经注》：“浦阳江导源乌伤县。”导源乌伤，未尝实指源出何山。但浦阳江其流甚长，则其源不一，深袅发源特其一耳。东径诸暨与泄溪合。此指乌伤西北境，今浦江义乌之水入诸暨为浦阳江者也。浦邑之发源深袅山者，入于诸暨丰江。义乌之洪巡溪、演溪、又深溪发源于龙祈，苏溪发源于清潭，亦入诸暨丰江。其诸暨之开化溪两源，皆从东阳来，但东阳水北流入诸暨，不可言“东径”。此《水经注》之遗漏耳。五泄溪发源富阳山，东流由竹桥入诸暨即浦阳江下流也。“东回北转，



径剡县，县开东门向江，江广一百余步。”此指乌伤东境，今东阳之水入嵯为曹娥者也。剡县即嵯县。嵯在东阳之东北，故云“东回北转”。《绍兴府志》云：“剡溪在县南一百五十步，北注与曹娥江接。其源自东阳之玉山，东流合天台、奉化、宁海所入之水，会于县城。”又云：“曹娥江界会、虞二县，中又名上虞江。其源自剡溪来，东折而北，至曹娥庙前，又北至龙山下，名舜江。又西北折入于海。此《水经注》之确证也。若将此几句与上文连看，谓由诸暨而‘东回北转’以至剡县，则决不可通矣，乃是另指一派耳。”又云：“柯水东北径永兴，与浙江合，谓之浦阳江。”永兴即萧山县。汉曰余暨，吴曰永兴。此指浦阳之由钱塘入海者。《汉书》：“潘水即浦阳江别名。自外无水以应之。”又云：“浦阳江东北径始宁县嵎山，其北即嵎浦。”又云：“东径上虞县，南至莽之会稽，名虞宾。”此皆指曹娥江也。又云：“余暨之南，余姚西北，浙江与浦阳江同归海。”又引《阡驷十三州志》：“江水至会稽与浙江合，自临浦南通。”此二条，皆指浦阳之由钱塘入海者。

浦阳江其说不一，自相牴牾。按：《水经注》并无矛盾，因其中分支别派，未经指出，似乎淆错。若分别观之，自有头绪。谢惠连《西陵遇风》诗：“昨发浦阳纳，今宿浙江湄”。《韵谱》云：“水之相入为纳。”又云：“水北曰纳。”自浦阳江北流入浙江，二水参错，其名曰纳，宜矣。始宁今上虞县，嵎浦、嵎山皆属嵯县，虞宾属上虞，又接余姚江，临平湖，在浙江以西，其源殊别。忽及“临平湖”，殊不可解。余暨即诸暨，距余姚二百余里，谓“余姚西北浙江入海”，非也。盖此江东北流自山阴、会稽，溯曹娥江。逆流而上曰“溯”。水性下流，岂能上行？始至上虞、余姚、嵯县，谓



“东回北转”入上虞、嵊县，始可矣。道元未尝身履浙东，故其误如此。后人遂误此江为上虞江，其失寔邈。其说支离牵强，无此水道，反以道元为误，真可异矣。以《地理考》之自浦阳江至曹娥百余里，岂当时曹娥之名未著，亦名浦阳邪？或陵谷迁变，旧流不循故道邪？《十道志》：“浦阳江有琵琶圻，岸有曹娥碑”，信此则曹娥即浦阳江尔。《文选》注：“浦阳纳经上虞”。谢康乐《山居赋》：“浦阳江自嵎山东北径太康湖”，其说皆误。《嘉奉志》既知曹娥即浦阳，何以又斥为误，况道元固未尝身履浙东，岂谢康乐桑梓之地，自注其赋，亦不问水名、不知水道，若此邪？今山阴二十里有柯桥，其下为柯水。然则浦阳江与柯水同源，由萧山达于浙江，古今不易也。按：《绍兴志》无柯水，但有柯桥。云其下即柯水，特臆见耳。况柯水既在山阴，何《水经》云东北经萧山邪？《汉地志》上虞县仇亭柯水东入海，但亦与“东北经永兴”不合，阙之可也。今按（以下系张元忭之言），《上虞县志》：“曹娥江始实名浦阳，其源自东小江，亦由浦江来。”曹娥江与发源浦邑者无涉。此《上虞志》之谬也。《十道志》：“婺州浦江，江之导源出此。”此言浣江一派耳。“是知浦江同源而分二派。”二派之说然也，同源非是。一直由诸暨直下，至山阴、萧山间，为钱清。郦所谓“迳诸暨与泄溪合，余暨之南与浙江同归海，至会稽与浙江合，自临浦南通者皆是也。一则纡而东。按：浦邑之水只达诸暨并无“纡而东”。经东、义以至嵊县者，总由专执深袅一派将曹娥、浣江，都由浦邑发源，不得不创为又“纡而东”之一说。实则毫无影子。至嵊县，出始宁门乃折而北，至上虞、会稽间为曹娥江，郦所谓“东回北转”，径剡县、始宁、宾虞、余姚西北者，皆是也。谢康乐



山居目击为赋，又自为注，不应有误。惠连谓“昨发”“今宿”，若钱清似不须隔宿。余暨乃萧山旧名，非诸暨。曹娥未溺之前，江固当有名，且今曹娥庙当运河渡口，故其名特著。若稍南、稍北，又自不以曹娥名，谓当时曹娥名未著亦名浦阳，似与郦说未甚牴牾。但身则实未至浙东，只据籍隳括，不免稍有淆错耳。元怵将曹娥、浣江分为二派，于《水经注》大略相符。因受误于《上虞志》专指浦邑一源，失其水道甚矣。著书之难也。按：《省志》及绍兴府属各志俱载此篇，而诸说互有参错，阅者如在云雾中。故附载之，而存其辩论焉。

《薛志》按：禹贡三江既入，诸说纷纭。以“震泽底定”之义揆之，断指扬子江、吴松江、钱塘江三者。盖扬子入海于西北，钱塘入海于西南，吴松入海于东北，四面之水皆有所归。而居中之震泽，得以蓄泄自如，安澜而无患。此二句括尽东南治水成功形势，不特禹功无二史材，亦千古无双，后人聚讼何为哉？三江本在吴越境内，故《国语》云：“与我争三江、五湖之利者非吴邪？”而韦昭注《国语》指以为吴松、钱塘、浦阳。若谓此，即《禹贡》之三江，则浦阳在浙东，震泽何与？若谓指吴越相争之界所，而别有所云，吴越三江者，则松江远在吴地，非属境，上说亦难通。总之，明乎“既入”“底定”之旨，则由《国语》之三江，即可得禹贡三江之所在。而韦昭之说及外，此所谓松江、娄江、东江，与夫北江、中江、南江之非，俱不辨自明矣。至若越之有三江口，乃指浦阳江入海故道，三分而复合流，与韦注《国语》之三江无涉也。浦阳、曹娥二名而实一名，一名而实二派，水道绝不相蒙。并列为三，亦非大谬。浦阳在浦邑境内者，至今犹称浦阳江，入诸暨则



随地易名为浣江，犹之曹娥也。前此曹娥固入海，浣江亦达钱清，而归于尾闾其入浙江者。特分流之一。故《旧志》云“浦阳以独入海而名之为江”也。自麻溪筑坝，故道已失。麻溪之说若何？盖江水经麻溪之南岸以达于钱清者，山阴境也；经麻溪之北岸以达于钱清者，萧山地也。山阴、萧山欲遏江水内溢之势。明天顺中，太守彭公谊相视，临浦迤北有一山在江中，名曰磧堰，因凿通之，令浦阳江水直趋磧堰北流，以与富春江合，并归钱塘入海。仍筑坝临浦，以断内趋之路。后人复于麻溪筑石坝，横亘南北，内地始无江水冲入。而嗣是浦阳江无复有钱清入海之路，专趋钱塘，以同归于海矣。粤稽浦邑向通潮汐，故有潮溪。海潮与江水相抵，故溪流停蓄，可资灌溉。自麻溪既筑海潮纤远，又仅入磧堰一线间，稍稍达暨邑，而浦地之听潮楼久为虚设。又地势最高，纵得大雨，江水无所抵拒，顷刻直泻诸暨间。诸暨受浦江、东阳、义乌之水，故浦江常苦旱，而诸暨常苦潦所由来也。且前此徽、婺、衢、处、杭、严诸水，在萧山之渔浦西北十余里，东北入钱塘之大江。若夫概浦江之水，经临浦、麻溪是谓小江，大江、小江各自入海，故水势犹杀。以今观之，而渔浦一带机隍不可支矣。盖三衢之水，东流龙游，经兰溪、严州、富阳，直抵渔浦，而汇于钱塘，此上江之经流也。其所受支流尤多，若金华、温处之水自兰溪入，徽州之水自严州入，新城、分水之水自桐庐入，皆东注之其渔浦之南。则概浦江也。受诸暨、浦江、义乌、东阳之水，经临浦磧堰而北注之。东注与北注之水汇合而相攻击，钱塘江又挟海潮而进。当春夏淫雨时，山洪骤发，外潮怒张，堤防虽固，力不能支，萧邑近堤之民，几有鱼鳖之虑。然则磧堰之开，临浦、麻

溪之筑，欲除水患而患更大焉！观《萧山志》黄九皋言曰：前此大江在县西北，小江在县东南，素不相涉。自凿磻堰、筑麻溪坝，由是概浦江与大江合而为一，以渔浦为汇国，而西江水患从此滋甚。深惟斯论，或彭公此举，有得而不免有失邪？善哉。孟子言：“禹之治水行其所无事也。”此可以训万世矣。



二、溪

1. 众 溪

《嘉靖浦江志略》：县东一里曰东溪。二十里曰深溪。二十五里曰左溪；曰白麟溪，郑义门所居也。西一里曰西溪。十五里曰吴溪。南十里曰槁溪，以其常涸也。三十里曰梅溪。北二十里曰湖溪。

北境之干水曰湖溪

《光绪浦江县志稿》：县北二十里，源出西北建德界之截柘岭。旧载发源岩坑山，名湖源。不知岩坑山泉特众，水所归之一耳。东流八十里，合檀溪，而北流山峡中，缭绕纡回，越荡江岭桐庐境数里，复经浦境，抵杭州富阳县，以达于浙江。会北境之细流而成大溪者也。其众流之属，曰茜溪、檀溪、剑溪。



2. 茜 溪

《光绪浦江县志稿》：县北六十里。南流经破石洞，入湖源。

3. 檀 溪

《光绪浦江县志稿》：县北六十里，经会龙桥，入湖源。

附：

檀溪八景

明邑人 张元谕

〔柘坞春耕〕

岩曲柴门倚柘枝，风光犹似上皇时。
春归四野柳先觉，乐在一犁农自知。
好鸟呼朋过别墅，寒云结盖覆东菑。
丰年剩有杯中物，携到山头日咏诗。

〔檀溪晚钓〕

白石齿齿寒泉鸣，流到檀溪碧草生。
幽渚独栖垂钓客，游鱼应识把竿情。
五更廖廓水天净，一曲沧浪山月横。
不到东溟渔已老，何心欲避任公名！

〔钱塘展墓〕

仙游何事不归来，泪尽空山白日颓。
烟雨凄凄猿叫啸，松楸飒飒鸟飞回。
绕丘独似趋庭步，酌地如何献寿杯？
赋到蓼莪浑是恨，谁知此恨更难裁！

〔会安招友〕

天上论交悔未还，羨君招饮买青山。
洞中日月弹棋尽，松下烟云满路间。
大笑无言心莫逆，角巾野服鬓同斑。
浮名共道非吾事，黄绮何须入汉关？





〔会龙哦松〕

会龙庄上翠微峰，种得扶疏百尺松。
散步纵观诗自就，清阴相引思偏浓。
风生谷口疏弦奏，云宿枝头偃盖重。
苦忆骚人无限兴，何时解组觅高踪？

〔惠云赏桂〕

萧瑟寒林木叶黄，青青桂树始含芳。
村沽白酒秋初美，露裛丹葩晚更香。
披拂凉风催好句，浮沉皓月纵飞觞。
惠云景色因君别，留与千秋作醉乡。

〔鸡峰步履〕

幽人步履鸡峰颠，踏破苔花到紫烟。
离却人寰无一事，始知天路有群仙。
山中白日迟迟度，石上丹芝故故妍。
为问桃源避世者，何如兀傲圣明年。

〔马塔濯纓〕

水经马塔寒更殊，一片琼浆泻玉壶。
头上切云清可濯，胸中翳雾坐来无。
迟回洲渚鳧鸥至，摇动烟波日月孤。
尔见潺湲犹有意，红尘未洗益惭吾。

4. 剑 溪

《光绪浦江县志稿》：一名建溪，即筱溪是也。县北九十里，西流入湖源。



5. 五泄溪

《光绪浦江县志稿》：五泄山在婺、杭、越三州之交，因山有五级，故名五泄。有东西二潭。东潭与浦邑无涉。西潭北自富阳山，来流十数里，有西龙潭，祈雨甚灵。西龙潭之山，东岸属富阳，西岸属浦江，土名西坑。横路系廿九都地，与石门诸山相邻。西潭之源，直长二十余里。五泄七十二峰，在西龙潭者居多，其十余峰属浦江。山自西坑横路下，南出即诸暨地，与东潭合。而西流折而东五十里，经诸暨县竹桥入若耶溪，即浦阳江下流也。《薛志》按：此溪不入湖源，另载北境诸溪之后。

中境之干水曰浦阳江

《光绪浦江县志稿》：源出井坑岭，东流二十里，别名吴溪。在县西十里，吴渭创“月泉吟社”于此。北有深袅山，涌泉为袅溪，南流数十里入之。故旧载发源深袅溪，因吴莱著书于此山中，地以人传耳。又逶迤东流二十里，绕郭之南，名南江，《十咏》所谓“南江夕照”是也。再东流二十里，别名潮溪，有鱼蟹之产，《十咏》所谓“潮溪夜渔”是也。再越二十余里，至杨家牌（俗称界牌）入诸暨县境，曰丰江，始通舟楫。由丰江口，绵延二百余里入海。会西东之众流而成江者也。其众流之属，曰寿溪、深袅溪、桑溪、大箬溪、小箬溪、文溪、真溪、西溪、东溪、中埂溪、槁溪、宋溪、派溪、澄溪、延寿溪、左溪、深溪、白麟溪、嵩溪、碧溪、下柳溪。

6. 寿溪

《光绪浦江县志稿》：县西二十里，南流与深袅溪并注吴溪。

7. 深裊溪

《光绪浦江县志稿》:县西四十里。

8. 桑 溪

《光绪浦江县志稿》:县西三十里。

9. 大箬溪

《光绪浦江县志稿》:县西十五里。

10. 小箬溪

《光绪浦江县志稿》:县西十里。

11. 文彦溪

《光绪浦江县志稿》:即桃溪。县西六里,由童宅里巉尖发源。南流入南江。相传里人楼承攀捐築溪塍,名曰楼公塍云。

12. 真 溪

《光绪浦江县志稿》:县西十里。

13. 西 溪

《光绪浦江县志稿》:县西一里。源出杭口山南。入浦阳江。

14. 东 溪

《光绪浦江县志稿》:县东一里,源出仙华山,绕寿峰南入浦



阳江。

15. 中埂溪

《光绪浦江县志稿》：县东十里。

16. 宋溪

《光绪浦江县志稿》：县东南十里。

17. 槁溪

《光绪浦江县志稿》：县东南十余里。源出白石山东，入浦阳江。以溪常涸，故名。

18. 派溪

《光绪浦江县志稿》：县东北八里。一发源仙华山梅坞，一发源宝掌山。至此两派合流。经七里桥二里许，曰中埂溪。入浦阳江。

19. 澄溪

《光绪浦江县志稿》：县东南二十五里。源出义乌之分水塘。北流入县境，历经戚宅、戚村桥、张学官三处，次经治平寺。寺东泰平桥，陆出义乌者，道必由此。至下吴村而入浦阳江。

20. 延寿溪

《光绪浦江县志稿》：县东南三十里。源出双山岭。经石斛桥入浦阳江。



21. 左 溪

《光绪浦江县志稿》：县东二十里，源出白岩岭、大岭间，两源合流而下，故又名双溪。

附：

由双溪源抵岩口

邑人 戴望峰

攒青叠翠转如环，料峭寒生步履间。
潦退无波全露石，云残有态尚依山。
竹篱鸡唱烟初起，松径僧归鹤共还。
异境天开生面好，顿教回首厌尘寰。

按：南流数十里，经洪公桥之下流，又名八合溪。又南流六七里许，与浦阳江合，故又名合溪。黄氏世居于此。

合溪唱和

明 方孝孺

尚觉名家好，悠然胜地兼。
入门愁即破，爱客意无厌。
座上苏司业，人间蜀子瞻。
白头辞紫禁，皂帽映苍髯。
昔别情犹在，重逢喜更添。
才高殊莫敌，道合迥无嫌。
已愧琼酬李，虚惭玉倚蒹。
大篇劳往复，盛德蔼撝谦。



鲸海波涛阔，龙韬部伍严。
力雄排造化，兴逸困飞潜。
耻以文名世，聊凭志养恬。
云霄机斲息，泉石趣方淹。
境僻还便静，秋初尚带炎。
浮云避高栋，晓日转疏帘。
曳杖穿花过，携觞藉草拈。
漱沙寒水静，出树远山尖。
园实登新脆，泥封析嫩甜。
兴浓忘日暮，醉罢任衣渐。
细沫吹潭鲫，狂歌吠野獫。
鸟惊窥影逝，童讶隐篱覘。
病渴呼香茗，耽凉憩古栴。
几人闲得似？此乐意俱欢。
贱子成何事？铅刀岂解铤。
谩怀旁海岛，只合滞闾阎。
奔走裘将敝，周流突未黔。
陋邦惭晋楚，行潦怯沱滮。
性介难同俗，时艰畏颇儉。
侧身空宇宙，长剑倚乌蟾。
渐近昇平复，欣逢德化霑。
人多望霖雨，谁为作梅盐？
稷下才方盛，隆中口欲箝。
长吟答知己，凉月度虚檐。



合溪唱和

苏伯衡

胜概东州少，嘉宾席上兼。
秋怀从悄悄，夜饮判厌厌。
义聚今争羨，名宗胜具瞻。
一门安素履，三老总皤髯。
野处神情畅，朋游乐意添。
过从初不厌，谈谑又何嫌。
偃觉风行草，苍看露肃蒹。
传盃存揖让，执礼信劳谦。
吾子才真敏，诗篇律更严。
不孤名士誉，肯学老夫潜。
天地供行乐，泉林足引恬。
盍簪夫岂易，行李莫辞淹。
树密晴疑雨，山深暑不炎。
临流催展席，待月试钩帘。
异味寻常出，香醪勉强拈。
酒澄双涧碧，楼抗独峰尖。
世自殊冰炭，君将等苦甜。
波颓能树立，风靡得纤渐。
俗学辽东豕，人情岭外獫。
异常那免怪，无罅岂忧覘。
时正营清庙，村宁弃钜枿。
角闲贫亦好，道在思犹恹。



但使携盘错，终能决钝铢。
鸥盟聊草泽，蠖屈且闾阎。
穷学家留浙，乡闕路出黔。
久荒负郭业，思涉伏流灞。
纳禄因怀土，归耕匪避儉。
迟留怨猿鹤，迅速感乌蟾。
鄙句劳酬答，残膏饱丐霑。
相知怜鲍叔，刻画愧无盐。
也作蝇鸣窍，谁甘马在箝。
歌呼成大瓠，乌帽落风檐。

22. 深 溪

《光绪浦江县志稿》：县东二十二里。在王家祠东北百余步。其溪经水阁塘，自北而南入浦阳江。义门王氏居于此。有《深溪十景》。

23. 白麟溪

《光绪浦江县志稿》：县东二十五里。源出金芙蓉山东南，流入浦阳江。义门郑氏居此，郑氏远祖名白麟，此溪所由得名也。《薛志》：溪上石碑三大字，元中书右丞相脱脱书，翰林学士欧阳元题后。



附：

麟溪行

元西安 璩致恭

仙华山，青参差，势若万里东南驰。高接云霄几千仞，上有帝女炼药之灵祠。至今丹光夜夜照林壑，气下萃为麟溪。麟溪如环复如带，孝义郑氏居其湄。同宗聚族已九世，子孙蛰蛰循家规。事严冠婚与丧祭，教有礼乐书共诗。仁声义闻浹旁郡，岂但狗出鸡哺儿。江东陈氏、张公艺，两家盛名当与齐。我生岩谷甘栖迟，严霜早陨连理枝。因君义行重感激，扼趋何日登宾墀。



白麟溪

明 邹奕

麟溪流水漾清辉，华袂文光动紫微。
九世同居端有义，一门纯孝在无违。
桂林秋露侵黄卷，棣萼春风照彩衣。
昔日千龄同不朽，五云制锦出纶闱。

24. 嵩 溪

《乾隆浦江县志》：松溪，县东四十里。

《光绪浦江县志稿》：前志作“松溪”。县东三十五里。源出鸡冠山。南流经孝门桥入浦阳江。

25. 碧 溪

《光绪浦江县志稿》：县东四十里。南流入浦阳江。有《碧溪八景》。

附：

碧溪八景

金华 曹开泰

〔碧溪钓雨〕

箬笠青蓑衣，问君将安往？
门前鱼欲来，昨夜春水长。
潇潇细雨寒，潺潺曲涧响。
香饵岂不设，吞钩故难强。
临渊亦偶然，底用退结网。

〔桃坞樵云〕

渔郎出武陵，后此罕能至。
岂意白云坞，樵者时掉臂。
累累实如斗，采采红满地。
勿使斧柯烂，迷花久留滞。
归语陶彭泽，重谱桃源记。

〔鸡冠望潮〕

寒风吼千崖，白练挂一缕。
谁令绝壁顶，江光上层宇？
迢迢铁马驰，杳杳素蛟舞。
巍然鸡冠山，去天真尺五。
决背海门高，飞身欲轻举。

〔狮子卧雪〕

借问百兽长，何年此息迹？



一夜玉花飞，不觉头毛白。
想是驯伏久，甘受严寒迫。
形骸虽偶变，本性终不易。
莫因雪霁后，吼破重岩碧。

〔献岭哦松〕

一峰秀插天，百尺龙鳞老。
客亦喜龙吟，卧此几昏晓？
披襟怒髯张，着屐层岚杳。
此事本不急，索句几能好。
苍松莫相笑，吾是瘦贾岛。

〔屏山拥翠〕

远山横翠屏，未若近可瞩。
乐哉村居者，日在屏中宿。
软尘隔千里，图画开六幅。
何啻琉璃窗，照见须眉绿。
请君莫垂帘，时时送游目。

〔仙洞栖霞〕

梯险如梯云，入径如入甕。
毕竟何王代，留此仙人洞？
探幽途路黑，振衣泥泞重。
彩霞倏成绮，惊我栖真梦。
行当恣饱餐，出山跨赤凤。

〔平桥踏月〕

树杪惊栖鸟，水声怒如豹。



山居得月迟,桥平月先到。
更阑人语寂,万象同一照。
始悟镜中花,空色两佳妙。
候虫鸣不已,倚阑独长啸。

26. 下柳溪

《光绪浦江县志稿》:县东四十二里。南流注浦阳江。

南境之干水曰梅溪

《光绪浦江县志稿》:源出雷公、城窠诸山。西流二十里,南有黄茅山出小水,经宋尚书梅执礼宅前,故名梅溪。北流数里许入大溪。今通称大溪为梅溪。自东徂西,横亘南境。越六十里至横木,入兰溪。汇南境之细流而成溪者也。其众流之属,曰横溪、蜀溪、梅溪、黄沙溪、石溪。

27. 横 溪

《光绪浦江县志稿》:县西二十五里。北流经松柏桥,入梅溪。

28. 蜀 溪

《光绪浦江县志稿》:县西南三十里。源出乌蜀山。北流入梅溪。

29. 梅 溪

《光绪浦江县志稿》:此系古名之梅溪,即黄茅山所出者。



按：自八都雄鸡潭起，至九都乌苏潭止，为放生池。

30. 黄沙溪

《光绪浦江县志稿》：县西南五十里。源出太阳岭，北流入梅溪。

31. 石 溪

《光绪浦江县志稿》：县西南四十余里。北流入梅溪。



三、源

1. 丽水源

《光绪浦江县志稿》：县南十五里。

2. 白石源

《光绪浦江县志稿》：县东南十五里。

3. 石榔源

《光绪浦江县志稿》：县东二十五里。源出淡竹岭。

4. 西 源

《光绪浦江县志稿》：在县东左溪山后。

5. 华塘山源

《光绪浦江县志稿》：县东南三十里。

6. 曹 源

《光绪浦江县志稿》：县北三十里。

7. 大孤源

《光绪浦江县志稿》：县北六十里。



8. 小孤源

《光绪浦江县志稿》：县北七十里。合大孤源入湖源。

9. 磊石源

《光绪浦江县志稿》：县西八里。

10. 界牌源

《光绪浦江县志稿》：县西十八里。入浦阳江。

附：

行界牌源道次小憩

元邑人 柳贯

小谷疏村受数家，年芳犹有刺桐花。
白云不为青山地，截断前峰两髻丫。
卷桐为角写乌乌，吹断行云日未晡。
雅郑亡来宁有谱，南音何得更函胡？

11. 罗 源

《光绪浦江县志稿》：县西二十里。

12. 长富源

《光绪浦江县志稿》：县西四十里。

13. 华 源

《光绪浦江县志稿》：在桑溪之西。



14. 小石塘源

《光绪浦江县志稿》：在县西，与建德界。元于石诗序云：“源深几百里，属严之建德接婺之浦阳。民俗淳古，真避世之地。”按：《薛志》不载。今本于诗补入。

附：

小石塘源

于石

万山郁回合，群木尤老苍。
细路百盘折，峙岨绕羊肠。
凉阴覆峭壁，萦回涧流长。
绿萝下百尺，笑挹清泉香。
甘寒试一漱，齿颊凝冰霜。
拂石坐未去，樵叟来我旁。
云此涧中水，其源出浦阳。
浦阳婺属邑，亦我父母邦。
我欲饮此水，而不忘故乡。
叟言起予意，振衣欲飞扬。
便将随水源，径渡千仞冈。
叟前挽我衣，迟留且勿忙，
吾家隔前坡，林居愧荒凉，
寒醅旋可压，为子炊黄粱。
微径行犖确，柴门隐松篁，
推户拂尘席，延我入中堂。



呼儿出长揖，阔步何踟踌。
问我从何来，惊顾走欲僵。
屡呼不复出，自起致茶汤。
坐不分宾主，高谈到羲皇。
炊烟澹茅屋，劝我饮尽觞。
葫芦烂鹅鸭，盘钉罗芥姜，
一饱共酣寝，此乐殊未央。
摄衣起谢叟，听我歌慨慷。
风埃暗宇县，干戈几抢攘，
朽骨缠蔓草，呻吟卧残创，
荒丘奔狐兔，断础悲虫螿。
奔逃不相顾，流离各悽伤。
十年不返业，几人失耕桑？
而此源中民，熙然独徜徉。
数家联聚落，茅茨带林塘。
笑语声相闻，隔篱灯火光。
翁妪各垂白，童稚纷成行。
嫁女必近邻，生男不行商。
死徙无出境，耕织各有常。
地炉老瓦盆，竹几素木床。
俗淳气亦古，岂识时世妆。
瓜瓠满篱落，麻苎翳门墙。
缺窦出鸡犬，平坡散牛羊。
豚蹄一盂酒，神休答丰穰。



村讴杂社鼓，醉舞衣淋漓。
昼无悍吏恐，夜无群盗狂。
生者遂所养，死者得所藏。
其乐有如此，宜与世相忘。
叟前重致词，为予言其详。
使我居华屋，绮疏交洞房。
使我服鲜丽，翠孺绣罗裳。
食必穷水陆，饮必酣琼浆。
出则盛车骑，归则拥姬姜。
贵封万户侯，富储粟千仓。
如此岂不乐？患至难豫防。
利者祸之的，何地非战场？
况有吏椎剥，宁免盗陆梁。
安贫即乐土，多财必遗殃。
人生守常分，世业胡可量。
我闻重太息，临风几徬徨。
林霏掩苍翠，回首路杳茫。
远山衔落日，惨淡尘沙黄。
因思桃源中，人多寿而康。
山深事简康，居安俗淳良。
不与外人接，别在天一方。
儿孙自生长，古今任兴亡。
世以为神仙，此说诚荒唐。
平生志远游，恨不穷八荒。



去家百里近，绝境见未尝。
邈与桃源居，异世遥相望。
安知千载后，以我非渔郎？
独恨无桃花，夹岸摇红芳。
花落春水涨，一苇或可航。



四、潭

1. 赤壁潭

《光绪浦江县志稿》：县东一里，东溪中最宽深处也。

2. 仙鸽潭

《光绪浦江县志稿》：县东四十里，其溪名龙溪。自义乌北来，折而东，入诸暨。山上有大石直下，跨于潭。其空处可通人行。上有龙王庙，祈祷历验。相传潭有二鸽，时时隐现出没，因名。庙旁为放生池。

3. 龙潭

《光绪浦江县志稿》：县南一里。旧名龙溪。岁旱祷之辄应。

4. 灵泽潭

《光绪浦江县志稿》：县南十五里。即白石湫也。相传神龙居之，岁旱祷之即应。宋嘉定三年，知县李知退以应祷闻，敕封“灵泽侯”。故名。元至正十一年，县尹萧文质祷雨有应，邑士夫赋喜雨诗，戴良为序。按：宋咸平五年大旱，七月十五邑人楼全尝于此潭斩蛟致雨。里人建庙祀之。今称楼全庙。国朝邑令何子祥因祷雨有应，于源口添建龙神庙，修龙潭道路，筑方台，颜曰“浦阳第一溪山”，自为记。



附：

修龙潭道路筑方台记

何子祥

由谷口以进潭，路随峰转，径绕溪行，纡回偏仄，跨巉岩，计程五六里始至潭。樵夫上下，蹊止一线，黄叶积而白云封，明灭断续，几难辨识。肩輿固不能达，芒鞋草履，健于探奇者亦屡虞顷跌。因命工人，随险而凿以砌之，长不计数，宽则定以四尺。筑方台于潭上，整齐平正，周围以丈五尺为度，高尺有零，中安石塌，以便迎龙祷雨者拜奠行礼。创始则乙酉荷月也。吁！使斯胜而生于西湖、虎邱，当游人如蚁，楼阁傑起，况屡有功于人者，何至如蚕丛鱼鳧，几与人寰隔绝，仙山净境，神固不欲人数问津耶？予深为之慨叹云。



5. 大王潭

《光绪浦江县志稿》：县北二十里。

6. 猫儿潭

《光绪浦江县志稿》：县北二十五里。在虞宅家下。

7. 七台潭

《光绪浦江县志稿》：县北五十里。在黄檀源里。

8. 狮子潭

《光绪浦江县志稿》：县北六十里。有巨石横出潭中，状如狮

子。向为河渚周姓放生处。当春和水暖,游鱼百千成队相贯而出,轩髻鼓鬣,传为美观,人歌咏之。

9. 蟒潭

《光绪浦江县志稿》:县北六十五里。过此为严州府桐庐界。

10. 漳龙潭

《光绪浦江县志稿》:县北廿八都地。人于此祈雨焉。



五、滩

1. 中广滩

《光绪浦江县志稿》：县北八十里。

2. 鹰嘴滩

《光绪浦江县志稿》：县北一百里。

3. 浦及滩

《光绪浦江县志稿》：县北一百里。



六、泉

1. 月 泉

《嘉靖浦江志略》：在县西二里。源出仙峰之下，相传视月盈虚以为消长，自朔至望则增，自望至晦则亏，因名焉。详见学校志“书院”。

奉议方氏曰：太极一理，气耳，分阴分阳，大化磅礴，升降八统之中，盈虚消息，可见者惟月为著。盖月禀太阴之气，而具乾坤阴阳之理，与《易》之八卦，准惟太阴也。故其变合自坤之纯阴始。☷为坤，阴体也。阴变则阳合，一阳动于下为☳震，而哉生魄；越五日，二阳进于中☱为兑，而弦始平；又五日，三阳升于上为乾，而阳体备，是为望，前之三五，阳长之候也。阳长光溢，为月之盈，☰为乾，阳体也。阳变则阴合，一阴动于下☵为巽，而魄渐减；越五日，二阴进于中☴为艮，而弦复平；又五日，三阴升于上为坤，而阴体备，是为望后之三五，阴消之候也。阴消光损，为月之亏。水亦然，今钱塘潮汐，常与月相符契。浦江为婺斗邑，万山底拒钱塘，隔几岭谷地脉论之，非海潮比。而邑之一泉乃与月相消长，或者推而莫知其端倪，且以隐显归之时与数。吁，亦孰知夫理气之相为贯通也乎哉。

宋政和三年疏月泉池，筑月泉亭。知县孙潮疏池、筑亭，以备游观。嘉定十有六年修月泉池，知县赵崇莱修。癸未筑月泉亭，邑尉赵崇揆筑之。

仪曹楼氏曰：《淮南子》曰，积阴之寒为水，水之精者为月，月系乎坎而生水，已见于羲皇《大易》之书。阳薄乎泽而生月，复见



于圣训《道经》之序。然则生明示象，流形地中，昧者不察也。吴越富山水，取名藉甚。唯兹泉载地志，二三大夫独见旌赏，得无旨乎哉。试为之语曰：清可溉似心，止可鉴似智。悟容光于观澜，似造精微；窥精神于清夜，似见性本。三五盈缺，与月齐声，又似知时而进止者。不然激其余波，味其溢流，润泽生民，尚无限也。

月泉弗应岁久荒芜，非随月盈虚之旧矣。咸淳元年，导月泉源复之，筑月泉塘，筑月泉亭。知县王霖龙，疏导去榛与草而导其源，增石与土而补其漏。缭之以栏，植芳妍以绚其阳；翼之以堂，荫茂密以崇其幽。又于池之前筑塘，为斯泉之储，乃复虚盈之旧。

学正朱氏曰：月泉，学池也；池边，皆学旷地也。泉之通塞，士之否泰关焉。此邑人才位文昌，登台察者大节凛然，炳炳史牒色正芒寒，月泉实钟美于是。王令尹浚而通之，泉涌如沸，宁非构携魁枕之兆欤？故为之说曰：清莹秀徹，能使人才之泰，南有台北有莱者，月泉也；忠信诚悫，能使月泉之复，盈而虚虚而盈者，令尹也。有客曰：其数欤？余应之曰：坎于舆为月，惟刚中可以济坎；蒙山下出泉，惟养正可以发蒙。昔飞泉为李二师而涌，井泉为景伯宗而出，感而遂通，惟此心耳。心，太极也，其动为阳，其静为阴；其光为日、星，其泽为雨、露，皆非心外物也。子亦知侯之心乎？茹古涵今，养清源也；苏枯弱强，溥恩波也。洞幽烛隐，涤冤滥也；爬痒栉垢，无宿蠹也。崇学校而百废具兴，混乎其盈科，若水涌而碧沁也；屏嗜欲而一尘不染，寂乎其虚室，若水涸而泥融也。囿宽厚于精敏，寄发摘于抚字，春嘘秋吸，风行雨





止,浩浩乎若虚而盈、盈而虚,莫得以测其神也。是则月泉盈虚之复,实自侯方寸中来。数云乎哉,游泳于斯者,鸢飞鱼跃,道源性渊之乐,足以泝河、汾而达洙、泗,魁奇卓异之材出矣。则是亭也,岂独木石水泉之适欤?

《光绪浦江县志稿》:县北二里。源出县北仙华山之下。按:源实出富润尖。《薛志》误。其泉随月为消长:自朔至望则盈,自望至晦则退。因名。

附:

月泉游记

宋 谢翱

余少慕初平叱石事,知婺有金华洞瀑泉之胜,而未知有月泉也。月泉在浦江县西北二里。故老云:其消长视月之亏盈。由朔至望,投柿其间,泉浸浸浮柿而上,动荡芹藻,若江湖之浮舟,拥泊于岸,视旧痕不减毫发;由望至晦,置竹井旁,以常所落浅深为候,随月之大小画痕竹上,当其日之数,旦而测之,水之落痕与石约如竹之画,视甃间滞萍藓,枯青相半。殆类水退人家,日蒸气湿,墙壁故在,而浮槎游楫,栖泊树石,隐隐可记。余与友人陈君某至,适望后二日,陈君指萍与草,以为斯泉亏落之验。盖冲漠朕兆间,盈虚消长之理,与山川呼吸往来之气,相值而不爽也。如此,非必有神物主之,如杂书怪录所谓“巨鱼吞吐”云也。泉旁旧为堂,祠朱、吕二先生,环阑楯甃上,环诗亭上。四顾烟云竹树,复环泉若亭,不敢左。其东北之山曰仙岩者,远望类芝草浮空而立,若皆有所待于斯泉而向焉者。予方谋日游其间,与月约

盈亏,泉约消长,与山约无盈亏消长,互来今以老。吾诗有迷仙岩之遗迹,约余游岩之麓者,将吹鹿鸣之引,以拟笙鹤。曰:“子欲穷山中之胜,而惮以足赴目乎?”余欣然从之,故书泉之本末,以纪兹游之始。

元邑人 唐高镕

金波汇其余,随后迭盈虚。
潮不异庐涧,泄非长尾间。
照影逃罔象,流彩恋蟾蜍。
岂比无源潦,才能满即除。

金华 徐木润

兹泉以月名,与月共亏盈。
万古自辉映,一泓常湛清。
地通沧海脉,气合太阴精。
未尽形容妙,余诗想像成。

月 泉

浦江旧有明月泉,久而不应。今乃疏道其源,似颇与弦望晦朔之间相为消长者,遂作是诗。

邑人 吴莱

大区何浑沦? 元气乃潜泄。
忽然为山水,无往不融结。





遥天偶一照，厚地空余冽。
盈将光共生，涸与魄同灭。
玄机自消长，至理谁圆缺？
发挥虽有在，窥测尚未决。
枯查曾几栖？断湫遽中裂。
半倚岚翠云，微通海潮雪。
昔人来推求，于此得表蕝。
虚亭奚其敞，静甃独不啮。
岁年竟悠远，沙石渐填咽。
宁加疏濬功，肯使见闻衰。
恍疑合图经，环坐列稚耄。
倘非蟹投碇，几类鲋处辙。
纤纤浮晶彩，湛湛浸寥沓。
旧观方尔还，真源可吾绝。
争言彼月行，岂为兹泉设？
萧丘胡长寒，汉井或再热。
逝寻白兔公，直探神龙穴。
狂歌水仙词，击碎如意铁。

按：自宋政和三年，知县孙潮访旧址疏为曲池，岁久堙塞。嘉定十六年，知县赵崇莱治之。咸淳三年，知县王霖龙复筑塘以潴其泉。明嘉靖五年暨崇祯六年，先后重浚，不一其地。国朝乾隆四十一年，知县薛鼎铭于作忠堂关帝旧座下重浚之。

重浚月泉记

薛鼎铭

事有非思议所可究，而必思之议之，其为说终杌隍不安，浦江县之月泉是已。自古称泉之美者，大率以澄澈而甘香也。澄澈甘香不离乎形气之间，土石之所钟美，可以思议究也。月泉不专以澄澈甘香，而以随月消长见奇。天下之水，鲜有似于此者。泉之名，不知昉于何时。自宋以来，其兴废则略可考。乾道时，子朱子与吕成公讲学泉上，名以大著。而前此六十余年，志称县令孙潮得月泉旧址而疏之。则是朱子以前，已不知几兴废矣。朱子后百余年，咸淳间，令王霖龙以其堙久重浚，亦表见于旧志。嗣是皋羽谢氏，乃以其晦朔弦望之消长，述之颇详。皋羽迄今，又五百余载。泉之灵胜少有称道之者，盖其泉复雍塞久矣。而今书院之在仙华山麓者，犹仍其名。不佞莅任之初，以课士至其所，问其泉，莫能指索。慨然于古迹之沦废，而月泉书院之名实不符也。因徧访于故老，亲探于山隅，于旧僧寺关壮穆神座下得其遗址，土膏滋漉，涓滴渗淫而已。今年秋略施疏决，泉即涌沸而出，遂汇为小池。施以阑楯，泓然一镜。当天空人静，宛然有脱去尘垢之想。虽以久废初开，消长之应未能毫发不爽。而按之方隅，此泉之为畴曩真迹，确无可疑者也。夫应不应何定之有？大凡物之钟美于地者有定，而瑞应于天者无常。月泉，泉之瑞者也，有朱、吕之莅止，而献其灵；有方、柳、吴、宋之迭兴，而豫其兆，不得乎此，则宁潜伏于密林幽草间，不肯自炫奇于庸众之耳目。其所以为泉品之殊特，非徒澄澈、甘香者所能几及也，必欲覃思渺虑，以求盈缩之故，是犹不知灵芝之无种，而必欲寻其





种；不知醴泉之无源，而必欲求其源。不已过乎？余宦此几四载矣，见浦江之人士，愿而慤，恭而有礼，且夙承其乡先生之教，有大雅遗风。安知胶庠中，不又有特出之彦，奋其文章事业，继往哲以耀浙东？吾于此泉之隐，久复见占之也。由是益振厉焉。将学成而利，见臬羽氏之所述，消长无爽者，庸讵不复其故象欤？吾与二三子，姑少俟以验之。

2. 孝感泉

《嘉靖浦江志略》：在县东三十里，白麟溪侧。宋郑绮母张嗜溪水，时旱竭，绮恸哭得泉，人以为孝感，因名焉。

御史王氏曰：浦江郑绮事母孝。母饮白麟溪泉甘之，绮日抱甕汲以供。夏不雨，泉涸。绮浚及数十尺，涸如故。乃哀号其下，泉忽涌出，芳甘异常。时人疑之，咸谓：恶！有是泉，与人何相涉哉？盖适然尔。君子谓：不然。李广利、耿恭特武夫之雄耳，拔刀刺山，环甲拜井，飞泉为之涌溢，矧至孝者精神之所召耶？若如论天神感应之理，熄矣。绮歿后，泉且湮塞。六世孙大和重凿，甃以石，使可汲。南郑王理既为释其疑，复作铭。铭曰：孝弟之至，通乎神明，斯言慎不诬矣。饮是泉者，孰非人子哉！

《光绪浦江县志稿》：在县东二十五里，白麟溪南。宋郑绮母张性嗜溪水，值旱，凿数仞不得泉。绮恸哭其下，三日夜不息，水为涌出，俄顷溢丈余。人以为孝感所致。至今绀碧甘冽，为第一泉。泉旁石碑三大字，明蜀献王书，御史王理铭之。

附：

孝感泉

国朝邑人 戴望峰

盈盈白麟溪，水味清且冽。
相传昔孝子，有母饮成癖。
岁旱水脉枯，疏凿绝涓滴。
岂无他水甘，母口苦不适。
孝子起徬徨，呼天为号泣。
一号土膏动，再号土脉裂，
三号水洊至，沧波遍洋溢。
旱魃为之藏，天吴为之决。
鉴此孝子心，供彼慈母食。
一从泉涌后，终古永不竭。
至孝通神明，天人理非隔。
嗟哉行路人，临渊宜自惕。



3. 椒 泉

《光绪浦江县志稿》：县南三十五里，在观岩之顶。取《尔雅》“山顶曰椒”之义，谓之“椒泉”。宋钱遯筑堤漭之，名椒湖塘。互见水利。

4. 飞锡泉

《嘉靖浦江志略》：去县东二十二里，左溪寺之西庑下。相传寺旧无泉。宝掌师与玄朗游，因飞锡引泉。故名。

《光绪浦江县志稿》：县东二十二里，在左溪寺之西庑下。相传寺旧无泉，宝掌与玄朗游，飞锡引宝掌之泉注之。

5. 白牛泉

《嘉靖浦江志略》：去县南五里，邑人于康菑泉，可溉田。

6. 梅花泉

《嘉靖浦江志略》：在东明山精舍中，有水一泓曰灵渊。渊之东百步许，有泉冷然，老梅如龙横蹲其上，曰梅花泉。

《光绪浦江县志稿》：县东三十里。元郑德璋筑精舍于东明山。舍旁有水一泓，曰“灵渊”。渊东百步许，有泉冷然，老梅横蹲其上，曰“梅花泉”。

附：

梅花泉

元邑人 郑渊

梦醒罗浮月满家，冷然一勺浸寒葩。
空明照胆无纤翳，贞白同心绝点瑕。
茗碗香清癯鹤骨，冰壶泉绕护犀牙。
春阳暖到虬枝上，池畔芳氤长绿霞。

7. 宝掌泉

《光绪浦江县志稿》：在县北十里。宝掌山岩窞出。泉极甘寒，虽盛夏漱之齿击。



附：

宝掌泉

元东阳 陈樵

屋上无端雨乱飘，雨留石罅碧寥寥。
浮光出穴藏丹浅，浣水为花到地消。
石发年深长满洞，玉鱼春冷未生苗。
泉中自是蛟龙窟，顷刻阴云满树腰。





七、塘

《嘉靖浦江志略》：宋天圣初钱氏侃筑东湖塘，县西南三十五里，通化乡；大观二年尚书钱氏遹修东湖塘。遹，侃之孙也。字德循，为工部尚书。政和元年尚书钱氏遹筑椒湖塘，县南三十五里，通化乡，溉田十余里；尚书钱氏遹筑西湖塘，县西南四十里，通化乡。

三塘迭筑，侃也创之，遹也继之，仁人之利博矣。此公天下以为心，而不为己私者也。钱氏其兴乎，故一书再书又再书，各举其氏以深美之也。或曰，美之而名遹何也，各其祖于上，则不得字其孙于下，此礼之常也。呜呼！邑之塘，如三湖之当筑者众矣。闻钱氏之风而兴起者岂无其人？予重望之。是故，美钱氏以劝众人也。凡言筑者，创始也；言修者，完旧也。

众塘

《嘉靖浦江志略》：县东南一十五里，曰鹤塘。《道经》谓双鹤自塘心戾天，因名。广袤数里，可注田二千亩，今属义门郑氏。东一十里，曰天仙塘。西十二里，曰徐大塘。西五里，曰陈湖塘。北二里曰黄驮塘。北三里，曰上毛塘。北三里，曰下毛塘。北六里，曰蒲茨塘。南八里，曰黄大塘。东二十里，曰长塘。东二十一里，曰水阁塘。西四十里，曰郑深塘。西三十里，曰墓莹塘。西二十五里，曰汤大塘。东二十五里，曰松林塘。东四十五里，曰莲塘。东四十五里，曰后汉塘。东四十五里，曰簸箕塘。三角塘：去县东北二百步，水注月泉。耆民张廷器建书屋于塘之上，

名三塘书院。

《民国浦江县志稿》:众塘

东 乡

士林塘 郑宅市东首,面积五十余亩。

清 塘 在清塘村以北得名,亦名大塘。民国廿七年村人陈德征修浚攻利更倍。

小南乡

夏 塘 在大溪楼。

金丝塘 在大溪楼。

柳家塘 在平安张百□山脚。

宅里塘 平安乡始祖圣九公祖宅之里,故名。但此塘无田灌注以备村人洗浣消防之用。

郑家塘 在平安张门前大路沿。

深 塘 在平安张门前大路沿。

长 塘 在平安张门前大路沿。

三眼塘 在平安张门前大路沿。

外方塘 在平安张门前大路沿。

里方塘 在平安张门前大路沿。

箫 塘 在平安张门前大路沿。

和尚塘 在平安张门前大路沿。

瓦窑塘 在平安张祠前对面一里许,面积十亩余。

蔡 塘 俗呼蔡塘角,此塘大半淤塞。塘后墘辟作稻田。

郑横塘 即郑横塘村之得名。面积四亩余。

上石塘 在郑横塘村。



下石塘 在郑横塘村。

大塘 在后徐畈。

枫树塘 在潘宅。

深塘 在潘宅。

南乡

五和塘 在横溪村中,面积二十余亩。

七星塘 在长陵祝门前,一连七口,故名。

沙池塘 在白沙镇村北里许,面积四十余亩。

西乡

沉湖塘 县西五里许,沉湖乡以此塘得名。面积六十余亩。

民国廿四年,珠山后等村人疏浚,有水利会员八十人。

高塘 在珠山后村。

莲塘 在珠山后村。

黄泥塘 在石马头。

麻车塘 在石马头。

上塘 石马头大路沿。

下塘 石马头大路沿。

吴大塘 在下吴周村中。

大皮 西门外三里许。

五分塘 塘角距城五里。

包大塘 五分塘下。

泉水塘 在杨田周坟头前,有泉水涌出,大旱无虞。

下方塘 罗塘村南。

罗塘 罗塘村南。



鱼尾塘 罗塘村南。
 吴塘 罗塘村南。
 前荷长塘 马桥头西南二里许。
 马塘 马桥头家顶。
 派塘 马桥头村西北。
 判塘 马桥头上新屋屋顶。
 荷明塘 东坞山头村下。
 剪莲塘 唐岭山冈后。
 黄墩塘 唐岭金门前。
 莲塘 上赵。
 北乡
 后坞塘 在丁家屋后。
 大塘 在大塘源。
 王塘 在赵氏冈附近。
 门口塘 在廊下门前。
 水口塘 在廊下门前。
 茅山塘 新廊下屋后。
 毛高塘 高坑岭头毛高畈。
 荷茶塘 在寺前。
 里塘 在寺前。
 中央塘 在寺前。
 东塘 在寺前。
 上四塘为寺前全村公堂。



附:陂

圣者陂

《嘉靖浦江县志略》:去县东二十三里,左溪寺前。陂下之田受利。

《光绪浦江县志稿》:寺有圣者陂,久治不就。一行童捐身其中,始完。

附:池

1. 洗钵池

《光绪浦江县志稿》:县东二十三里,属左溪寺。唐李华作《左溪碑》云:“洗钵则群猿来捧”,宋后无可考。今于寺西南隅,斩茅凿土导别泉以成之。其广不盈丈,深不盈尺。

2. 放生池

《光绪浦江县志稿》:县东南一里,龙德寺东。宋咸淳元年,知县王霖龙置,并建亭于池上。



八、堰

《嘉靖浦江志略》：大明嘉靖四年冬十月修仙华堰，县东七里，德政乡。知县毛凤韶修濬。凡兴作合义在民者，必书其姓氏异之也；在官者，皆分所当为也，故不书此类是也。

按《筑塘解》：嘉靖乙酉春三月，聚峰毛子循行于邑中，则召诸父老告之曰：“尝闻之矣，救荒无他奇策，不如讲求水利。惟邑负大山，山险地狭，土壤硗瘠，民业不振。天时一不至，即苦早曠，水利尤所当讲也。历考之，域中无大水可凿引灌溉，则莫如修陂塘而已。试为尔筹之：田近溪涧者，依溪涧开沟渠以灌注。有壅塞者，启之；有阻夺专利及立碓磨自便者，命改之，不从，告拟法。田无溪堰者，则为塘。如田五亩相连，则将上一亩筑塘；田散落，则每丘筑一小塘，大约以十分为率，将二三分为之。积四时之水为一时之用，何忧于旱！”父老曰：“恐伤田。”毛子曰：“田有塘，则永有秋，粪多力勤，所利足以补所伤矣。若惜田不为塘，使终不早则可，旱则并弃之矣。”父老曰：“侯之言是也，恐土无所归。”毛子曰：“高起塘塍而坚筑之，仍加筑各田之塍务高厚，虽少占田不当恤，则土分矣。老农云：‘种田先做塍，种地先做沟。’余见尔民，田塍侵削甚薄，水才入即渗出矣，何怪乎田之易涸、岁之不登也。”父老曰：“侯之言是也。上以足国税，下以足吾私，敢不勉图。请托之木，以告未谕者。”毛子曰：“可。”遂书而刻之，名《筑塘解》。今附志。





众 堰

《嘉靖浦江志略》：县东五里，曰芦塘堰。东二十里，曰八石堰。东一十七里，曰吴家堰。东一十五里，曰葛家堰。东一十五里，曰智贺堰。西四十五里，曰石沈堰。西五里，曰石陵堰。西一十二里，曰前吴堰。北二十里，曰钱堰。北三十里，曰席场堰。北五十里，曰大淤堰。北五十二里，曰人畷堰。北六十里，曰广滩堰。

《民国浦江县志稿》：众堰

东 乡

共和堰 在□村屋后，受浦阳江之水□□□□□。民国十七年为石埠头村人所造。

黄 堰 在芳地夏泉二村之间，即云嶂岩脚太祖殿附近处。

黄 堰 同上。

葛家堰 在黄堰下。

门口堰 在芳地门前。

官 堰 芳地村前。

新厅堰 在芳地关帝庙下。

上六堰受左溪之水注此。

□ 堰 在十三都海塘下

小南乡

源口堰 在白石源之出口处，为第二节堰。自此堰以下至白石源终点即下于村兴隆桥下，共有十三堰。

长潭堰 在下季宅石桥头。

横 堰 在赤山殿前。

南 乡

陵江堰 在九都陵江畝北。从前此堰专事蓄水以便水碓。民国初元,由倪、陈二姓合力修筑,并扩大规模以利农田。

锹石堰 在十一都里井村外,为东湖塘以时蓄泄而利农田。

西 乡

新坵堰 在沉湖乡。

七十堰 下吴周白麟殿东边。

八十堰 梅山屋脚。

长流堰 梅山村北。

留 堰 傅店村顶。

新 堰 傅店新桥头。

石大堰 石宅壩头下。

石陵堰 牛山尾。

菜蓝堰 外陇石陵之下毛桥之上。

上五堰均受浦阳江之水。

莲塘堰 马项头村顶。

石塔堰 山隍殿前宋店上首。

太古塘堰 宋店村顶。

三斗堰 太古塘堰堰顶。

门口堰 珠山后。



石马头堰 石马头。
清水堰 山榧桥头水口外。
九斗堰 山榧桥头水口外。
官堰 山榧桥头水口外。
百子堰 山榧村外关帝庙下。
毛蒲堰 山榧村外关帝庙下。
石塔堰 岩下村顶。
宋岭堰 岩下村顶。
金方堰 前吴村石桥上。
大堰 明德寺前。
小堰 明德寺前。
古流堰 在新店村西李公殿对面。
门口堰 新店。
白石堰 新安桥下。
柴湾堰 柴湾马桥附近。
鹭丝堰 马桥头盛姓家顶。
壩头堰 马桥头横横。
丁溪堰 盛姓家下。
后畝派溪堰 在寿溪之小溪口。
三十六堰 在寿溪之小溪口。
经堂堰 在寿溪之小溪口。
井头堰 在寿溪之小溪口。



明头堰 在寿溪之小溪口。

北 乡

神仙堰 在胡浆口之上,大王潭之下,此堰初成时有神仙经过,故名。

高阪堰 高阪。

胡浆堰 胡浆口。

后门堰 牛头山脚。

后瞿堰 后瞿山脚。

席场堰 虞宅席场桥之上。

柘林堰 柘林荷叶衙二村旁。

横磊堰 在新渡村顶上。

上八堰受壶源江水。

门口堰 在石井于新屋门口。

孔坵堰 大岭口家顶。

门口堰 在大岭口门口。

平风潭堰 新渡。

上 堰 大坂。

竹沿潭堰 大坂。

刀石塔堰 下黄。

苍来新堰 下黄村下。

大 堰 毛坪头村。

小 堰 毛坪头村。

山坳堰 在上河陈氏宗祠后面。



花坟前堰 东源花门前。
石骨堰 东源花门前。
横坵堰 东源花门前。
水口堰 大源水口家沿。
桥下堰 西源桥下家边。
高坵堰 西源高坵。
九十堰 西源九十田边。
茅山堰 西源新廊下家沿。
高畈堰 在大姑源高路畈。
低畈堰 在大姑源高路畈。
上二堰受大姑源之水。
郑家畈堰 南山村前。
殿口堰 南山家下。
上二堰受大、小姑源合流之水。
大淤堰 在平湖大淤畈。
栗社堰 在栗社畈。
周家毛堰 在盘洲畈。
独石堰 在荡江岭脚。
下独石堰 在荡江岭脚。
佛堂堰 会龙桥胡公殿前水碓脚。
避水岭堰 佛堂堰下。
子头堰 避水岭下。



沉塘门堰 子堰头下檀石近。

寺口堰 寺前街路沿。

和尚堰 寺口堰下。

苍坵堰 在新造马塔亭脚下。

上六堰受檀溪之水。

前方堰 在前方村赵氏冈下首。

金涧堰 在平湖畝上源。



九、井

1. 四角井

《嘉靖浦江县志略》：去县西一里。深不踰寻丈，井水甘冽，傍民居多，朝夕汲之，不盈不竭，其名甚著。

《光绪浦江县志稿》：县西一里，深不踰寻尺，而泉水甘冽，居民朝夕汲之，不盈不涸。其名甚著邑中。

2. 乐山井

《光绪浦江县志稿》：县西二十五里。

3. 金井

《光绪浦江县志稿》：县西三十里，在深裊先生“松山小隐”之旁。泉水清冽异常，冬夏不竭。见《吴士谔记》。《薛志》按：山川一门虽分类纪载，仍不能备列也。余详见都鄙。

4. 太平井

《光绪浦江县志稿》：县城四牌楼、横街东西二井。

《民国浦江县志稿》：城内公井

县前	宫口	四牌楼	下巷口头	南门子
县后	官司井头	凌宅苍	高堆脚	城隍庙
石祠前	右边	季祠前	大西门下园	
西马路	大路口	下田坂	东门大司后	祖厅后



十、涧

斤竹涧

《嘉靖浦江志略》：去县东北九十五里。



十一、水利

《光绪浦江县志稿》：读河渠书，详言水之利害，益知古大禹之尽力乎沟洫，与疏河、导江无异者，其为民计至深远也。邑之灌溉，全赖陂塘、堰埂，非治其堤防，慎其蓄泄，旱潦何以无虞乎？志水利。《薛志》。

德政乡

1. 陈湖塘

《光绪浦江县志稿》：县西四里，四都。

2. 黄大塘

《光绪浦江县志稿》：县北二里，四都。《旧志》作黄驮塘。

3. 天仙塘

《光绪浦江县志稿》：县东十里，一都。

4. 徐大塘

《光绪浦江县志稿》：县西十二里。

5. 上毛塘

《光绪浦江县志稿》：县北三里，四都。



6. 下毛塘

《光绪浦江县志稿》:县北三里,四都。

7. 蒲次塘

《光绪浦江县志稿》:县北六里,四都。

8. 南湖塘

《光绪浦江县志稿》:县西北二里。

9. 赵山塘

《光绪浦江县志稿》:县南三里,五都。



嘉 兴 乡

1. 鹤 塘

《光绪浦江县志稿》:县东南十五里十五都。《旧志》:相传望见白鹤自塘中翾天而去,因名。广袤数里,溉田二千余亩。五代时,有四川吴氏来居其旁。

附:

鹤塘

宋邑人 黄震龙

星星鬓影雪霜堆,还入骚坛镜里来。

鱼畜池中何日化,鹤飞天际几时回?

何妨落笔诗千首，赢得开怀酒一杯。
心地清闲随处乐，欢娱奚必候登台。

鹤塘

明邑人 郑柏

鹤塘之水如西湖，清波潋滟金碧铺。
轻风来时飞云浪，皓月浸景湛冰壶。
神鱼变化知莫测，潜伏深渊以时出。
群山众壑齐生云，腾波一跃高千尺。
天台墨客中书贤，鳞鬣笔下生云烟。
玉堂得此清梦远，持赠鹤塘之隐仙。
隐仙词章世英妙，名满朝端尚高蹈。
三亩儒宫十亩园，两顷荷花一兰棹。
观鱼自得濠梁乐，不在玉璜渭川钓。
水光山色有余清，濯缨歌罢闲舒啸。
天地跃鳞会有日，蓬瀛刷羽何时到。
三复兹图怀故人，写寄狂歌君莫诮。

鹤塘

郑棠

〔其一〕

鹤塘高隐士，结屋白云乡。
酿酒时盈甕，摊书日满床。
醉看山色好，吟对竹阴凉。



潇散神仙境，全胜五柳庄。

〔其二〕

鹤塘高隐士，景趣胜西湖。
水濶游鱼乐，沙晴浴鸟呼。
荷花香满望，菱叶翠平铺。
一棹烟波里，身间世上无。

〔其三〕

鹤塘高隐士，水木共清华。
好鸟蛮歌韵，群芳蜀锦葩。
开园晴摘果，汲井晓烹茶。
笑傲春风里，浮生乐有涯。

〔其四〕

鹤塘高隐士，上应少微星。
家擅康成学，亲传太史经。
兴来歌赤壁，醉后写黄庭。
至宝人间贵，何如献大廷。



2. 黄驮塘

《光绪浦江县志稿》：县南八里。《旧志》作黄大塘。

灵泉乡

1. 水阁塘

《光绪浦江县志稿》：县东二十里十九都。



2. 长 塘

《光绪浦江县志稿》：县东二十里。炎宋初，黄氏由东市徙居于此。

3. 圣者塘

《光绪浦江县志稿》：县东二十二里十七都地。三山环抱，周围十余亩，灌田二百余亩。

通 化 乡

1. 东湖塘

《光绪浦江县志稿》：县西南三十五里。宋仁宗天圣初，邑人钱侃筑。徽宗大观二年，侃之曾孙尚书遯重修。

附：

东湖塘记

南宋邑人 钱遯

东湖在天圣初，吾曾祖经始立为堤以潴水，尝命吾祖董是役，三年乃就绪，其艰棘可知矣。吾族人环湖皆有田，赖以灌溉，而无旱岁。其余波且浸及比邻，则吾曾祖所以惠贻后世子孙与夫乡里者，岂不厚哉！屡年于兹，风雨漂泊，鼯鼠穴蠹，而吾家族大累重，人力时有不给，淀淤颓圯，所谓旧堤防，所余无几。遯一日试往观焉。踌躇四顾，追念吾曾祖当年经画具在，于是捐余俸，以旁市滨湖之地而增益之。阅月之良，涓日之吉，鸠工备材，

发廩粟，具畚鍤，一旦辟而新之，以复吾曾祖之惠。其堤防薄者埤之，卑者高之；其地势狭者斥之，迂者直之。恢恢乎其广矣！当是时也，气序清和，人乐输力，干筑完密，夔绝前比。其所潴水，汪洋潏滂，未易以量数计，而浸灌蒲鱼之利，又且十百余时也。是役也，肇自大观二年正月己辛，工告毕功首尾涉两月，而人不告病，乡人亲旧长老，无不至观焉。其劝相劳来，往往喜见于言色，退曰：“二公规画之于前，曾孙侈大之于后，实吾乡所未有也！”遁于是乎书之。



2. 椒湖塘

《光绪浦江县志稿》：县南三十五里。观岩山之顶有泓，沛然不竭，曰椒泉。宋徽宗政和元年，尚书钱遁因筑堤潴为巨浸，与东、西湖并称为“三湖”，凡溉田十五里。遁自为记。

附：

椒湖塘记

南宋邑人 钱遁

余家之东，有山浑然而中峙者，曰观岩。岩之顶，有泓沛然而不竭者，曰椒泉。二者独钟一方地气之秀，故山色长青，而泉味尤甘。嘉祐中，吾祖与先考大夫，尝议建堤潴水以待岁旱。中间更事龃龉，未能也。大观戊子，遁自视无用于时，乃上书告老于朝。天子从其请，退而经理生事，以为终焉之计。然欲修灌溉之利，以追成吾祖考之志，亦未逮焉。越四年，蒙恩起自田野进直禁严，又命领宫祠于亳社，虽备从官食厚禄，而犹窃里居，因得



以间暇。阅月之良，涓日之吉，发积粟，捐余俸，鸠材募工，凿石积土，筑为长堤，潴为巨浸。而称名椒湖，盖取《尔雅》“山顶曰椒”之义也。是役也，始于辛卯孟冬初五日甲子，成于壬辰季春十五日壬申。工徒劝事，土功坚密，夙无前比。堤繚然而崇厚，水弥然而广深。天清风止，虚明不蔽，可鉴毛发。遇岁大旱，则可大决之，小旱则可小决之，其势无异居高而建瓴水也。余家农亩日被润泽，而余波浸浸，旁及者未易以一二数，于斯泉未始有加损焉，亦奚媿于井德之地也欤？环湖益植以杉木、佳竹，葱蒨蓊郁，掩映两山之间，万籁作止，鸣禽上下，四时殊景，物态无穷。樵夫耕牧提负往来，前者歌，后者和，各适其适。余每杖藜止堤上，周览旁听，以穷山川之趣。而万虑消陨，飘然若行方外。行者过其下莫不驻足仰视，恍然如虹龙之横空，蝮螭之下饮，皆喜慕而称叹。大暑流金，渴者造焉，不待解襟挥箒，自生清凉之思，而忘疲茶之烦矣。况于均灌溉之利者哉！此区区，又乐与邻里乡党共之也。平居窃伏，自念材智朽薄，分远迹以自匿，老死于宽间之野矣。而王明下烛，国恩横被，进有以荣其衰，退有以成其私，何其幸哉！役既成矣，旁郡比邑，咸苦旱暵，而吾里并堤之田独大穰，乡人咸以德余。呜呼，非圣天子加惠小臣而便其私，岂能及于是哉？为吾乡人者，宜其息争讼，时贡输，无犯于有司，以庶几图报圣天子之万一。顾欲以虚名自委于不肖，岂所望也哉！政和五年正月十五日记。

3. 西湖塘

《光绪浦江县志稿》：县西南四十里。

附：

西湖塘记

明邑人 倪尚忠

去予家二里许，折而南，为西湖。志称宋尚书钱公通父子筑三大湖以利乡民。一椒湖，一东湖。椒、东各有记，而西独阙焉，岂有待耶？椒湖近且湮塞，仅一山隈耳。东湖宽其下上，而中二阜束之特隘，若葫芦然，今为蒋氏世业。西湖一山中峙，左右环抱，坦夷深广，恍若大镜之开匣。三湖各为亩凡五六十有奇，岁岁各溉田数百亩。所称利乡民者以此。钱氏子孙不能守，递兴递废。国初，湖属郑氏。弘、正间，稍稍属于家。伯祖父孟重公辟精舍其中，与义门外弟郑宗澜、宗岱，余姚王先生琥，时相往还吟咏。暨伯父仲甯公时，半为湖边黠丐所据。迨予筮仕，而湖始全属于予。盖杖履之地化为甌脱，而旧日之风流儒雅，亦在荒烟蔓草间矣。嗟嗟可胜叹哉。予每冀修复，未遑也。甲辰再覲便省太孺人于家，始构楼三楹，旁簷各五楹于湖之西偏，以居守者。筑垣百余丈，规为园艺。杂果木千余株，竹数百个，园曰“经鉏”，门曰“湖西小隐”。盖自是身羈宦邸，而念无日不在池园矣。丁未罢归，复辟故址，据湖上为阁五楹，上下俱复道檐，可环走四眺，阁曰“恩纶”，以藏勅命，荣君赐。堂曰“飞跃”，以时游詠课儿辈。周垣以甃，杂蒔花木，复凿小方池，种金鲤可千头，左右各为厨湑，前复为门三楹，榜曰“小西湖”。沿湖岸植以桃、柳、李、榴、桧、柏、女贞、芙蓉之属，草草将有绪，自非有故，未尝不偕诸二三昆弟往，往未尝不信宿。第见夫虎尖、芝岭、西康、钟阜、龙门、壶盘、乌椒、黄芽、狮岩、石壁诸山，时献葱蒨于吾目，若锦屏亦若绣





帟,若采管亦若飞练。而澄湖似掌,小艇如鳧,鼓棹开篷,分蓼拔苻,浮白引满,浩歌移席。时或烟雨微濛,水天苍碧。青萍乍动,绮縠缤纷。雪月昏朝,冰壶掩映,儵鱼之鼓鬣,鸥鹭之忘机,莺鸠之坐语,渔牧之行歌,无一不以供吾适,而恍如身世之蓬瀛矣。旧令公须君美、郡丞公袁抑之,后先来访,予西湖之曲。君美扁予楼曰“山雨”,亭曰“狎鸥”,而各系以柱联,大概取唐人诗句之似者,以颜其上。夫习池、平泉、愚溪,皆足以吞兹湖八九。而予之亭榭,不足以当兰亭诸名园万一,徒以先世之遗,宝若杯棬,方谋为祠于阁之后,奉先赠君以上数世,俾酌水网鳞,以供岁时之祭。宁谓傲睨王侯,留连光景之为沾沾乎?万历庚戌仲夏记。

4. 郑驮塘

《光绪浦江县志稿》:县南三十五里。

5. 洪塘

《光绪浦江县志稿》:县南四十里。

6. 龙塘

《光绪浦江县志稿》:县南三十五里。九都地。周围二十余亩,石陵倪氏迁居通化,家于此。因塘为号,故称龙池倪氏云。

7. 山塘

《光绪浦江县志稿》:县南二十五里。

8. 翁东塘

《光绪浦江县志稿》:县南三十里。

9. 两头塘

《光绪浦江县志稿》:县南四十里。

10. 墓莹塘

《光绪浦江县志稿》:县西三十里。



11. 郑深塘

《光绪浦江县志稿》:县西四十里。

12. 汤大塘

《光绪浦江县志稿》:县西南四十五里。

13. 陈大塘

《光绪浦江县志稿》:县南二十里。相传为陈百廿五协忠侯生长处。

感 德 乡

1. 松林塘

《光绪浦江县志稿》:县东二十五里。

2. 莲塘

《光绪浦江县志稿》:县东四十五里。

3. 后溪塘

《光绪浦江县志稿》:县东四十五里。

4. 簸箕塘

《光绪浦江县志稿》:县东四十五里。

5. 柿林塘

《光绪浦江县志稿》:县东二十五里。

6. 潼塘

《光绪浦江县志稿》:县东四十里。二十都地。大十余亩,灌田一百五十余亩。

兴贤乡

山后塘

《光绪浦江县志稿》:县北九十里。二十九都地。大五十余亩,灌田三百余亩。



附：堰

德政乡

1. 南桥堰

《光绪浦江县志稿》：县南一里。

2. 下岩堰

《光绪浦江县志稿》：县东二里。

3. 清水堰

《光绪浦江县志稿》：县北一里。

4. 葛泽堰

《光绪浦江县志稿》：县西二里。《省志》作葛潭。

5. 石陵堰

《光绪浦江县志稿》：县西五里。

6. 芦塘堰

《光绪浦江县志稿》：县东五里。

7. 仙华堰

《光绪浦江县志稿》：县北十里。



8. 前吴堰

《光绪浦江县志稿》：县西十里。

灵泉乡

1. 八石堰

《光绪浦江县志稿》：县东二十里。

2. 葛家堰

《光绪浦江县志稿》：县东十五里。

3. 吴家堰

《光绪浦江县志稿》：县东十七里。

4. 智贺堰

《光绪浦江县志稿》：县东十七里。

5. 美肥堰

《光绪浦江县志稿》：县东十八里。今名毛尤堰。

通化乡

1. 石沈堰

《光绪浦江县志稿》：县南三十里。



2. 青坦堰

《光绪浦江县志稿》：县南三十五里。《省志》作县东。

政 内 乡

1. 钱 堰

《光绪浦江县志稿》：县北五十里。

2. 大坂堰

《光绪浦江县志稿》：县北五十里。

3. 广滩堰

《光绪浦江县志稿》：县北六十里。

4. 大湫堰

《光绪浦江县志稿》：县北六十里。

5. 二家堰

《光绪浦江县志稿》：县北九十里，廿九都地。灌田二百余亩。

感 德 乡

官 堰

《光绪浦江县志稿》：县东三十里，二十三都地。



兴贤乡

1. 三角堰

《光绪浦江县志稿》：县北百里，三十都。灌田二百余亩。

2. 溪西堰

《光绪浦江县志稿》：县北九十里，三十都。灌田三百余亩。

3. 旋荡堰

《光绪浦江县志稿》：县北百里，三十都，灌田二百余亩。

拗井

《光绪浦江县志稿》：县南嘉兴乡十五六都等处，水脉独深，用桔槔不便。因于田畔穿井，其形下宽上窄，离井数丈竖一直木。其上用横木，一头扎定，一头悬竿以系桶，凡三株。惟直木不动，其余二株随手上下，以是灌田，名曰“拗井”。

水碓及水磨

《光绪浦江县志稿》：皆藉水运机，循环不穷，以代人力。木杓碓，凿空碓尾，引水注之，水满则尾坠而一舂，亦循环无已。



十二、桥 梁

《嘉靖浦江志略》：宋元符中尚书钱德循建南桥，去县南一里。每积潦，人莫得渡。尚书钱遹始构桥江上。

元至正三年修建南桥，筑浦阳堤。桥后坏于水，江堤遂决。沿江之田皆漂毁不存，民往往病之。达鲁花赤江西那海公来为县长，每过南门辄念斯桥之坏，而民多病涉。明年冬，役民复治桥。桥成，乃筑土堤，广若干尺，高若干尺而杀，其上甃以石，阅三时乃成，名曰“浦阳堤”。又垦田若干亩有畸。

贞孝郑氏曰：“滕侯子京治岳阳，因洞庭之水险，乃自岳阳门西，距金鸡之右，筑堤一千余尺以利民，名之曰‘堰虹’。欧阳子实序而记之，谓其以百步之堤，御天下至险不测之患。欧阳子岂过论者哉？今公之治浦江政，即无不修，又能以其余力兴数十年之废，其与滕侯之治岳阳，余恐无以异也。世常谓古之人为民兴利，而今之人无以继之者。观公斯举，其何愧乎！”



众 桥

《嘉靖浦江志略》：县东一里曰望仙桥，即东桥，仙华山水所经也。曰灵岩桥，即下岩桥。在东桥南七里曰七里桥，邑中之要地也。十三里曰三公桥，即王公桥，元至正邑人于昂建。十七里曰罗汉桥，先有巨石屹立溪中，相传石为罗汉所摄，即石建桥，因名，并左溪山水所经也。二十二里曰祝家桥，久圯，石郭水所经也。三十里曰义门桥，白麟溪水所经也。曰思孝桥，即孝门桥，俗谓颜孝子寓所后门。浦阳未置县时为乌伤北鄙，或是其途所



从入也。四十里曰朝天桥,桥北通天宫寺,故名,甄坞山水所经也。东南一里曰迎仙桥,即寺桥,仙华水所经也。三十五里曰玉龙桥,即石斛桥,溪源自义乌永宁乡来,所经不数里而注于浦阳江也。西南十五里曰杨桥,即西桥。西一里曰韩西桥,月泉水所经,堪輿家谓县之文曲星临此,桥立则士之决科者多也。北一里曰上达桥,旧名上岩,东桥之北也。三十里曰席场桥,岩坑山水所经,宋宝庆初,县人毛日严建也。

《光绪浦江县志稿》:《周官·司险》:“知川泽之阻,而达其道路。”郑注:“达道路者,川泽之阻,则桥梁之。”夫行者之通,王政所重也。邑之水归为三派,而细流甚多,一衣带隔之,则病矣。长民者,诚能以时修理。又有好义之士,起而共图之,庶占利涉乎?志桥梁。

东 隅

望仙桥

《光绪浦江县志稿》:即东桥。在县东门外。长三丈,广丈五尺。雍正七年,教谕沈裕记略:邑城东门名迎曦,又名环秀,有桥曰望仙。以仙华山水经此,故名。建造已久,兴废不一。雍正三年丁未仲春,太守车公临浦,步行出东门,周阅城垣,邑侯秦公率僚属绅耆相随。甫过桥,而桥忽圯。群相惊骇。太守曰:“此系通衢,亟宜治之。”邑侯唯唯,对曰:“是诚有司责也。”随命暂设木桥,以通行者。即捐俸择吉兴工,遴选董事,谋欲劝捐,以襄斯举。陈君尚齐有事来城,独认捐造。六月起工,至十月告竣,费金数百,

往来称利济焉。光绪二十二年，桥脚坍塌，全桥欲圯。尚齐族人陈宗义、德铭、德峻，并元妻张氏，合同修造。《旧志》载入四都。

一 都

1. 西山桥

《光绪浦江县志稿》：县东五里，西山岭脚。东溪源水经此入南江。长三丈，广一丈，元时造。国朝雍正癸丑张邦陞重修。乾隆三十八年张邦荣等捐修。同治八年张若珪世治等捐修。



2. 官路桥

《光绪浦江县志稿》：县东五里，前溪水经此。长一丈，广三尺。乾隆四十年里人捐修。

3. 万年桥

《光绪浦江县志稿》：县东五里，仙华、宝掌山水经此入南江。长三丈三尺，广丈一尺。乾隆三十六年项应文建。

4. 五郎桥

《光绪浦江县志稿》：县东七里，中埂溪水经此入南江。长三丈，广九尺。元时造。明世宗嘉靖十一年戴惟和重建。

5. 周孟珩桥

《光绪浦江县志稿》：县东七里，石宕源水经此合中埂溪入南

江。长三丈,广一丈。宋时造。乾隆三十一年周贤珺等捐修。

6. 东山桥

《光绪浦江县志稿》:县东七里,中埂溪水经此入南江。长三丈,广五尺。元时造。乾隆六年张一青等捐修。

7. 破溪桥

《光绪浦江县志稿》:县东七里,中埂溪水经此入南江。长丈五尺,广六尺。康熙年间造。乾隆三十一年张守模捐修。

8. 七里桥

《光绪浦江县志稿》:县东七里,宝灵溪水经入南江。长三丈八尺,广丈六尺。乾隆三十四年张以祖重建。

9. 十里桥

《光绪浦江县志稿》:县东十里,宝灵溪水经此入南江。长二丈,广八尺。明万历中造。光绪十七年朱宗秀、张时光等捐修。

10. 终斯板桥

《光绪浦江县志稿》:县东七里,金店村左,中埂溪水经此入南江。

11. 五云木桥

《光绪浦江县志稿》:县东七里,金店村右,黄龙溪水经此入南江。



12. 新元桥

《光绪浦江县志稿》:县东十里,顶高口门前。

13. 凤凰桥

《光绪浦江县志稿》:县东十里,凤凰殿。

14. 建始桥

《光绪浦江县志稿》:县东九里。长二丈余。嘉庆庚辰年方修和堂造。



15. 望仙桥

《光绪浦江县志稿》:县东九里,长一丈余。

16. 望华桥

《光绪浦江县志稿》:县东十里。长一丈余。

17. 里仁桥

《光绪浦江县志稿》:县东八里,戴宅屋后。

18. 同乐桥

《光绪浦江县志稿》:县东八里戴宅。长二丈余。光绪九年戴宅捐修。

以上五桥,石宕源水所经。

二 都

1. 吴公桥

《光绪浦江县志稿》：县西十里，下葛门前。深袅溪水所经。元吴渭建。

附：

吴公桥记

元 邱悌

浦阳江水导源深袅，过县南，未可舟。有桥临其上，名之以其方曰南桥。为府县上下之所途。岁久，水避桥决，平陆涉者病焉。县之西十有二里，距江源未远，吴氏名渭字清翁者世居之。清翁倜傥不群人也。念滨水以居，而春潦冬冰，不可以徒涉，谓“济人非吾事乎？”乃岁丙戌至元二十三年，伐巨石，堤两涯半里许。明年，乘水落，砥其中者五。又明年冬十一月，桥成。高凡三十尺，广称之。其袤二百尺有奇，庇以亭，为过者休息之所。由桥东南溪山间，可数十里，与府县之途合或南江，厉揭莫测，则必假道于此，人以为利。而吴公桥遂名于乡。初，宋咸淳中，公与余纳交钱塘归而馆。余授其子幼敏学，而相与流憩西浒，已有为桥意。后别出。闻公为义不已，乃径归田园，与江湖树吟社甚适。今幼敏走介，邀余重来，则桥成，而公已逝。悲怆久之。幼敏请记于余。余问：“公为此桥用人之力与钱谷之数几何？”幼敏泣且言曰：“先人为此桥志于成而已。其初未尝计，终亦口未尝言也。岂惟此桥，凡所营为，往往类是。”余曰：“嘻，常人有所营，



为其未成也。先计之,或吝以中止,否则衰诸人即成,则贪功自多,且口之不置,惟恐人之不知、不闻也。而公乃尔,其过人远矣!余记之恐亦非公意也。”幼敏曰:“先生志之,示后之人,使知先人之志。世修之,庶几弗坏焉耳?”乃为之书。若夫山林、竹树之所,回环云烟、雪月之所,衣被樵牧者,蚤暮负戴者,东西流光静影,远近映带,恨不及与公携手亭上,酌酒赋诗,以供暮年之乐。噫,公神游亦未必惓惓于斯桥也!至元三十年正月十五日日记。



吴清翁石桥

方夙

金椎谁奋破山霆,趋石浑疑走六丁。
间道便须横蟒竦,长竿先已竖蜻蜓。
济川作略君堪记,吟雪行藏我欲经。
领取溪山好风月,更看高架翼然亭。

按:后废,支以木。光绪二十一年改建为石,易名“通济”。长二十四丈,广一丈六尺,费银万余两。

2. 通济桥

《光绪浦江县志稿》:县西十二里,长十二丈,广一丈,久圯。康熙十四年吴惟宇重建,又废。吴姓公造木桥。

3. 杨 桥

《光绪浦江县志稿》:县西十五里,长三丈,广八尺。道光八

年盛守良重建。同治间盛德辉重修。

4. 余庆桥

《光绪浦江县志稿》：县西十五里。乾隆二十八年建。

上三桥深袅溪水所经。

5. 高 桥

《光绪浦江县志稿》：县西南十二里，前吴门前。袅溪水经此。长二十一丈有奇，上铺木板。道光二十五年里人吴大典等捐造。

6. 箬溪桥

《光绪浦江县志稿》：县西十二里后徐坂中。箬源水经此。长二丈有奇，广一丈。前吴吴大典造。

三 都

1. 马 桥

《光绪浦江县志稿》：县西十五里，寿溪水经此入江。长三丈，广九尺。雍正六年建。咸丰七年盛光荣重建。长五丈八尺，广七尺。

2. 陈岩头桥

《光绪浦江县志稿》：县西二十里，金童坞水经此入江。长三



丈,广八尺,乾隆中造。

3. 乐善桥

《光绪浦江县志稿》:县西三十五里。嘉庆二年沈圣礼建。

4. 花 桥

《光绪浦江县志稿》:县西二十里,金童坞水经此入江。长二丈,广五尺。《旧志》:乐山菴水所经。乾隆六年重建。



5. 新安桥

《光绪浦江县志稿》:县西南十五里。长六丈,广丈五尺。罗源、界牌等源水经此入吴溪。咸丰元年金明兴建。

6. 义聚桥

《光绪浦江县志稿》:县西南十六里。长四丈,广丈五尺。界牌、双珠等源水经此。光绪庚辰年里人捐建。

7. 悠久桥

《光绪浦江县志稿》:县西南十七里。长三丈,广丈二尺。双珠源水经此。道光二十八年,毛田庵顶盛德良造。

8. 大清桥

《光绪浦江县志稿》:县西南十八里双珠源水经此。长三丈,广一丈。乾隆甲午年朱桥头黄德鸣造。



9. 长生桥

《光绪浦江县志稿》：县西南十九里，独塘水经此。长四丈，广丈二尺。道光十八年慈溪周源丰建。

10. 永渡桥

《光绪浦江县志稿》：县西南三十里章山庄。长三丈，广一丈。

11. 永兴桥

《光绪浦江县志稿》：县西南二十一里。长四丈，广一丈。里人捐造。

12. 上义成桥

《光绪浦江县志稿》：县西二十里。长三丈，广一丈。光绪壬午里黄景八公造。

13. 下义成桥

《光绪浦江县志稿》：县西二十一里。长三丈，广一丈。光绪乙未景八公派下重修。

14. 观音桥

《光绪浦江县志稿》：县西南二十五里，观音殿脚。长二丈，广八尺。里人捐造。

15. 外毛桥

《光绪浦江县志稿》：县西二十二里，深袅溪水经此。长四

丈,广一丈一尺。张咸义造。

16. 双溪口桥

《光绪浦江县志稿》:三保。长六丈五尺,广一丈四尺。

17. 大 桥

《光绪浦江县志稿》:五保台头湾。长六丈,广一丈四尺。

18. 至德桥

《光绪浦江县志稿》:六保生坑口。长三丈五尺,广丈二尺。

上三桥周士芳建。



四 都

1. 上岩桥

《光绪浦江县志稿》:县东一里,东桥之南。长五丈七尺,广九尺。

2. 下岩桥

《光绪浦江县志稿》:县小东门外,大智寺前。长四丈,广五尺。

以上二桥,仙华山水所经,入浦阳江。

3. 登瀛桥

《光绪浦江县志稿》:县北三里,大花岭水经此入江。长一丈

五尺,广六尺。乾隆二十六年修。《月泉志》:在亭山之麓。

4. 道济桥

《光绪浦江县志稿》:县北四里。大花岭水经此入江。

5. 宪成桥

《光绪浦江县志稿》:旧名堰溪桥。县北五里,金坑岭水经此入江。乾隆三年知府叶公造。长三丈,广七尺,后废。三十三年知县彭坊捐造。

6. 带云桥

《光绪浦江县志稿》:县北五里,板桥村左。金坑源水经此。长三丈,广一丈,嘉庆癸亥陈光照造。

7. 一溪桥

《光绪浦江县志稿》:县北五里,金坑源水经此。长六丈七尺,广九尺。光绪九年里人重修。

8. 黄墩上桥

《光绪浦江县志稿》:县北三里,黄墩山西。长五丈七尺,广八尺。道光庚子陈宗义造。光绪年间捐资重修。

9. 花儿桥

《光绪浦江县志稿》:县大北门外。长丈八尺,广五尺。



五 都

1.大南桥

《光绪浦江县志稿》：县南一里许。江水所经，每积潦不得渡。宋哲宗元符中，尚书钱遹始立桥于上。广一丈九尺，亘三十丈，下酏水九道，视他桥为雄。岁久水决桥外，渡者告病。元顺帝至正四年，达鲁花赤那海公作大堤三百余丈，障水还桥下。其上创亭三楹，中间以奉浮屠氏，堤旁翼以扶栏，杂植槐、柳，作楼以憩行者。堤尽处别建小桥，以泄支流。人行堤上，斜睨县南，飞楼杰阁，掩映苍翠中，俨然图画也。堤曰浦阳堤，小桥曰问津桥。

附：

重修浦阳桥记

元 方樗

浦阳江出深袅源，经越之钱清，入于海。江去县治不一里，而近每积潦，人莫得渡。宋元符间，尚书钱公遹始构桥江上，久为横流旁出，桥若虚置，以故危圯颓压，靡能葺理。至正初，元复由故道行。越三年癸未，达鲁花赤那海公适长是邑，乃矍然曰：“天其或者有所属乎？”明年秋，因首割己俸为修治之，僚佐吏属莫不协从，凡闾巷乡鄙之在编籍者，亦皆出资以助。而公专任其事焉。遂鳩工伐石，具畚鍤，飭民庶，众效其力。如蚁斯集，如鹊斯构，不期月而成。其南又筑堤，与桥道接。堤杪构小桥，以疏别流，曰“问津”。旧有迎恩亭，在社壇之右，因徙就桥侧。且为





屋十四楹，以为侯憩息之所，扁曰“临清”。桥为拱道九，广十有九尺，亘五十步，因故名匾曰“浦阳江桥”。堤广视桥亘五百步，匾曰“浦阳堤”。于是，朱栏华柱映耀鲸波，虹跨鳌戴雅丽骇目，树以槐、柳，蓊蓊林林，樵者以歌，渔者以舞，负者戴者，以往以来，呼呼相属也。邑之父老来属余记。以为尚书公德业文章，晔然昭著，及于四方，而公又能输其余力，以利民涉。阅二百余年，未闻有卓然能起、仆弊而兴者。今公之兴是役，殚心致力，以为民先，鸡鸣而起，日入而息，热燥湿蒸，忘其疲乏。民舍穡事而趋役，不以为劳，出私储而食工，不以为厉。费省而用周，功成而效速。视尚书公经始之意，为无忝矣。则公之茂绩，推之于政，必将优美可观，奚止斯桥而已哉！工始于是岁之春月，毕于八月之二十有八日。是役也，桥为大，故为记之详焉。至正五年二月记。

南桥堤记

郑渊

浦阳江出县西六十里深袅山之南，经于县治之南门，东流入于海。宋工部尚书钱公适，尝作桥于江，以通行者。桥后害于水，江堤遂决，沿江之田皆漂毁不存，民往往病之。至正三年，江西那海公来为县长官，不数月有治声。每过南门，辄念斯桥之坏，而民多病涉。明年冬，兴役治桥。桥成，乃筑土堤。广若干尺，高若干尺而杀。其上甃以石，役三时乃成，名曰“浦阳堤”。又垦田若干亩有奇。公之惠及吾民者，不其至哉。县民感公之德不能忘，乃谋伐石请余记。余窃闻之滕侯子京治岳阳时，因洞

庭水之险，乃自岳阳门西，距金鸡之右，筑堤一千余尺以利民，名之曰“堰洪”。欧阳子实序而记之，谓其以百步之堤，御天下至险不测之患。欧阳子岂过论者哉？今公之治浦江政，既无不修，又能以其余力兴数十年之废，其于滕侯之治岳阳，予恐无以异也。世尝谓古之人为民兴利，而今之人无以继之者。观公斯举，其何愧乎！乌可以浅心而遽量兹世之人也是？堤之筑，其惠及乎吾民者甚宏，不可无记以告来者。遂书刻于江滨。后圯。明神宗万历二十一年，邑人陈玉捐田四亩、地一亩岁收租息，造木桥以便行者，民永赖之。国朝康熙十年，邑人李如珪募捐田五亩五分，以资修理。



邑人张一炜《重建浦阳江桥记》：当读《水经注》，谓浦阳江水导源乌伤，又东径诸暨与五泄溪合。复引韦昭注，以松江、浙江、浦阳江为三江，由是著名天下。然又引《地理志》云，上虞县有萧山，潘水所出，东入海，疑为浦阳江之别名。舍是水，无水以应之，故至今萧山尚有称浦阳江者。谢惠连《西陵遇风诗》有“昨发浦阳汭，今宿浙江湄”之语，盖指下流而云耳。然兹姑不具述。特以是江，襟带郭南，去城仅数百武，顺流而东，委蛇百里始通舟楫，而广罗吴越之利。若西南陆路，则远接闽、粤、豫章，近聊金、衢、严、处，虽非一大都会乎，而接踵络绎者，固未尝绝也。第渊深岸阔，流急波狂，壅塞无常，奔淤莫定，春涨夏霉，秋潦冬冽，湏洞沧漭之势，怒号冲究之威，不时间作其间。商贾负乘，士农骈集，往往望洋而叹。既印须之莫招，复旅宿之无处。即有急事，仓皇不得已。而轻身徒涉，侥幸万全，其为民之病也大矣，此徒杠舆梁，所以为王道之鸿规，有不得不急为先务者，是江之有桥



也。盖自宋元符钱尚书适捐资创建始，时行人德之。其后横流暴溢，江水别通一路，而桥下沙积成堆，竟为无用，渐被风日雨雪所剥坏。元至正间江流故道，达鲁花赤那海公复捐俸创建，一时佐属绅民，乐襄盛举。告成之日，又筑堤于桥南以障之，徙亭于桥侧以憇之，而加丹雘而夹雕栏。方樗、郑渊两先生作记，详哉其言之也。然始盛者难于其继，过丽者艰于其修。历有年所，非独桥圯亭颓，并堤亦渐坍塌矣。明万历中，陈别驾玉赋遂初之志，而切己溺之忧，毅然鸠工伐木以建之，可通一人往来。助田一石六斗，地四斗，徵租葺理，设心非不甚周，贻谋非不及远，而终以狭小，未便驰驱。今康熙十年，邑人李如珪兴继述之怀，以为扩充之计，属水月庵苾刍见如者，沿门拜募，善信乐从，更为大桥可用，数人互相往来，置田二石二斗，令菴庵僧掌之，以为修理之资。真久远之长策，而无量之福田也。工竣，谋伐石镌碑，问记于予。予维诸君之心见诸宾事，而予区区，仅托空言可乎？不知前人之功得予言以传，而后之人睹吾言而兴感者，或建或修，或输或募，不但前绩之不泯，而且扩而充之，将未有艾矣。宁敢以予之言，与方、郑两公并垂不朽耶？康熙癸丑小春上浣记。

按：据《桥田碑记》：陈玉助田四亩、地一亩，蒋明宇助田三亩，李如珪属僧见如募增田五亩五分五厘，周时希、薛有铭、胡有全、胡良瑞同助田一亩五分，周忠有、周明玉、周明珪同助田一亩，傅邦赞助地七分五厘，毛侯捐置民山六亩，赵志仁助银五两。乾隆四十年，项环玉呈明现在管理。岁修公产总数：五都八保德田五亩五分，九保德田六亩九分七厘，十六都二保嘉田二亩、民地一亩三分零五毫，三都六保官山六亩。《薛志》按：《碑记》所载与现存

田亩不尽合符,其中或系更换,或有侵欺,一时难以清理。姑两存之,以备稽察。

2. 小南桥

《光绪浦江县志稿》:县南一里。三都源水入此。木桥长十余丈。乾隆十年,生员楼铭等捐置岁修桥产,于启原助田二亩二分五厘,楼启禅助田一亩七分五厘,楼琼玉助田一亩五分,于以兴助田一亩,楼铭助田二亩五分,公资置买田一亩三分八厘。时管理人季尚维。按:今公置田一亩三分八厘,除建造桥屋外,只存田五分。嘉庆六年,知县彭志杰捐廉首倡,合大小南桥重加修葺,并令倪凤书等增置屋业田地,设会以资岁修。倪其旋堂助屋四间,潘怡顺堂助西隅屋三间,楼乐泮堂助田二亩七分五厘,楼振起堂助田三亩五分,张惟云助田一亩五分,于承富助田一亩二分五厘,张邦科助田一亩二分五厘,张忠廩助田一亩,楼广才助田一亩,于正春助地一亩,张用圣助地七分五厘,于承蕃助地一亩,各家捐资置买田三亩五厘,倪其旋堂助资买田一亩二分五厘。

附:

小南桥记

彭志杰

邑南城之门有二:曰文明,曰宣和。离南城不半里,波流浩淼而蜿蜒东注于暨阳者,为浦阳江,又名南江。志所载“南江夕照”也。江之源二:一出井坑;一出深袅,盖吴渊颖读书处也。江之桥二,上下仅隔半里许。出于文明门者,陆路走金、兰诸邑,出





于宣和门者，陆路走义、东诸邑；皆肩摩踵接，通衢毘周。《语》云：“天根见而水涸”，“水涸而成梁。”众流所汇，非桥不足利济也。上桥建于宋尚书钱公适。迄元，达鲁花赤那海公而甃以石，明别驾陈公玉而易以木。国朝李君如珪葺之，皆有记载于邑乘。下流之水，无文可考。浦阳江为入海三江之一，见于《越绝书》韦昭注、郦道元《水经注》。浦虽山陬小邑，江之名久著于浙东西矣。当霖潦暴澍，冰霜凜栗，问津者骈集，往往临流而叹。江之有桥，关于民生利害者，不綦重乎哉！嘉庆庚申春，予署浦江县事。甫入境，临南江上，下桥桥狭窄而危，行者病之。余愀然曰：“郑康成注《周官》司险一职，谓达道路者，川泽之阻则桥梁之，是王政之急务。为民牧者可忽诸缘，首先捐俸，市材鳩工。腐者新，脆者坚，其阔较旧规而倍其三，其高则参之。一双桥并峙，如虹之绾，如鳌之带焉。阅三月，工竣。惟江流不定，山水骤发，其冲突奔泻之势，坍塌无常，难为累石计，惟仍木桥为便。因思集事者，图始易，图终难，岁修工料，虽有旧置之田计数无多，非增恒产以给动支，则旋兴旋废，曷以永久？所赖好义者共襄义举耳。予之为倡，邑绅士咸踊跃乐输，所谓众志成城，一时之举百世之利矣。于是，定章程，稽出入，立成规，邑绅士之力居多。爰志所自，以告后来者。

咸丰辛酉粤匪扰浦，田地荒芜，经理乏人，两桥几废。同治四年，楼凤书、俞文秀等添设新会。又经绅士禀准，将县库房粮总项下拨出粮余（每两貳文），税房项下拨出税余（每两壹文）为岁修之费，复自前明。至国朝嘉庆，新旧产业统归于一，名南桥会，推俞文林经理。积资置田十亩，汇录新旧助产都保坵片，刊

有《南桥记》一卷。附：同治、光绪年间增置产业：许盛法助田二十五亩一分二厘五毫，陈桂熊助田□亩二分五厘，张薛氏助田一亩，张咸林助田四亩，黄忠广助田三亩，张忠雨助田七分五厘，彭光涌助田二亩，孙其华助田三亩五分，楼广业助田一亩五分，甘义益堂助田一亩，方忠明助田四亩五分、又地一亩，罗明瑞助田二亩，毛志静、志源助山七亩二分五厘、又志源助山五亩一分五厘二毫五丝，张邦棠助田一亩二分五厘，楼宏辉助田二分二厘零，朱耀仁助田八分八厘零、又价受田一分一厘零，周尚学助田二亩三分七厘五毫，楼鸿杰助田一亩二分五厘。俞文秀经营置买田十亩正。



3. 韩西桥

《光绪浦江县志稿》：县西一里，月泉水所经。宋仁宗皇祐时建，旧名文昌桥，即《府志》西桥也。形家谓：文曲星所临桥立，则登科者多。《月泉志》云：去登瀛桥半里许。

4. 太白桥

《光绪浦江县志稿》：县小西门外，大花岭水经此。长四丈八尺，广五尺。

5. 漕堰桥

《光绪浦江县志稿》：县大西门外，月泉水经此。长一丈七尺，广八尺。

6. 平步桥

《光绪浦江县志稿》：县小西门外，杭口岭水经此。长二丈，

广五尺。

7. 西安桥

《光绪浦江县志稿》：县大西门外，周王庙侧。杭口岭、大花岭水经此。长三丈，广七尺。乾隆二十二年捐造。

8. 永济桥

《光绪浦江县志稿》：县水门口，杭口岭、大花岭水经此。长三丈，广八尺。乾隆丙子年捐造。

9. 寺 桥

《光绪浦江县志稿》：楼亮锐《碑记》：是桥创造不知何年，然桥以寺名，则与龙德寺后先矣。乾隆五十九年里人捐造。嘉庆元年楼亮忠等捐建。

10. 太平桥

《光绪浦江县志稿》：县西三里，杭口岭水经此入江，长三丈五尺，广八尺。

11. 永安桥

《光绪浦江县志稿》：县西三里。

12. 新 桥

《光绪浦江县志稿》：县西四里，黄坑陈湖塘水经此入江。长三丈，广一丈。同治间周忠寅等重修。



13. 茅 桥

《光绪浦江县志稿》:县西四里,黄坑水经此入江。长三丈,广九尺。《旧志》:桃岭水经此。黄维祯重建。

14. 泉溪桥

《光绪浦江县志稿》:县西五里,周西坞源水经此入江,长丈二尺,广三尺。乾隆二十八年修。

15. 桐 桥

《光绪浦江县志稿》:县西五里,桃岭源水经此入江。长二丈,广五尺。

16. 西南江桥

《光绪浦江县志稿》:县西三里。木桥长四十丈。浦阳江水经此。道光间朱琴溪创造,同治间朱承贡等重修。

17. 同乐桥

《光绪浦江县志稿》:县西五里,木桥长四十丈。浦阳江水经此。石延宝等捐修。

六 都

1. 洪 桥

《光绪浦江县志稿》:县南二十里。龙门源、双溪源水经此入





梅溪。长十三丈，广丈二尺。顺治十八年建，康熙三十四年施大枢重建。乾隆十七年施伟元、施尹书、施茂桂捐修。嘉庆七年圯。施正珽捐田改修木桥。

2. 柳间阪木桥

《光绪浦江县志稿》：县南二十里，双溪水经此入洪溪。长六丈，广三尺。施亦通派下修造。

3. 双溪口木桥

《光绪浦江县志稿》：县南二十里，龙门源水经此入洪溪。长三丈，广三尺。施正夏派下修造。上三桥，同治间施见龙、尚吉、开璋等劝捐重造，并置义产，以资岁修。

4. 松柏桥

《光绪浦江县志稿》：县南二十三里，乌蜀山水经此入梅溪。长二丈四尺，广一丈。乾隆三十年重建，三十九年许正春修。

5. 上新桥

《光绪浦江县志稿》：县南十八里，五路源。长一丈八尺，广六尺，同治十年沈德元等捐造。

七 都

1. 下湖桥

《光绪浦江县志稿》：县南二十五里，横溪。长六丈，广丈二

尺。道光十六年柳光瑞等捐造。

2. 镇陵桥

《光绪浦江县志稿》：县南二十八里，宋宅洪溪水经此。长十五丈，广丈二尺。咸丰三年捐造。

3. 前 桥

《光绪浦江县志稿》：县南三十里，溪口周陇水经此入梅溪。长六丈，广六尺。



4. □□桥

《光绪浦江县志稿》：县南三十五里，长陵祝梅溪水经此。长十四丈，广八尺。

5. 同乐桥

《光绪浦江县志稿》：县南四十里，梅溪水经此。长十五丈，广丈六尺。咸丰间捐造。

6. 外下簪桥

《光绪浦江县志稿》：县南四十五里，轮岩源水经此入梅溪。长二丈五尺，广丈二尺。嘉庆间汪应美建，咸丰间汪立熊重修，并助亭基一所。

7. 普济桥

《光绪浦江县志稿》：长一丈八尺。

8. 双溪桥

《光绪浦江县志稿》:长二丈。

9. 干坞桥

《光绪浦江县志稿》:长二丈。

10. 杨公桥

《光绪浦江县志稿》:长二丈五尺。

11. 下马桥

《光绪浦江县志稿》:长二丈。

12. 成美桥

《光绪浦江县志稿》:长二丈五尺。

13. 双凤朝阳桥

《光绪浦江县志稿》:长二丈五尺。

14. 镇溪桥

《光绪浦江县志稿》:长三丈。

15. 镇东古桥

《光绪浦江县志稿》:长十丈。

16. 卧龙桥

《光绪浦江县志稿》:长十三丈。



17. 永斯桥

《光绪浦江县志稿》:长十丈。

八 都

1. 墩头桥

《光绪浦江县志稿》:县南四十里,梅溪水经此。长十五丈,广一丈四尺。道光年间捐造。

2. 大观桥

《光绪浦江县志稿》:县南四十里,菊花园源水经此入梅溪。长一丈二尺,广六尺。明时造。

3. 杨村桥

《光绪浦江县志稿》:县南四十里,梅溪源水经此。长一丈二尺,广六尺。明时造。

九 都

1. 卧龙桥

《光绪浦江县志稿》:县南三十五里,野猫源水经此入梅溪。祝氏建。

2. 永镇桥

《光绪浦江县志稿》:县南四十五里,外陶王村外。梅溪水经



此。长十八丈，广一丈四尺。嘉庆年间造，光绪十年捐改洞桥。

3. 普济桥

《光绪浦江县志稿》：县南五十里，石埠头庄后。梅溪水经此。长十八丈，广八尺，道光中捐造。

4. 西康桥

《光绪浦江县志稿》：县南五十里，西康源水经此入梅溪。长七丈，广丈二尺。道光中捐造。

5. 永济桥

《光绪浦江县志稿》：县南五十里，倪姓祠前。梅溪水经此。长二十丈，广八尺。嘉庆中倪其旋堂造，同治五年捐修，光绪□□年周玉润重修。

6. 洪福桥

《光绪浦江县志稿》：县南五十里，王沙溪水经此入梅溪。长四丈，广一丈二尺。嘉庆中倪中和堂建。

7. 马溪口桥

《光绪浦江县志稿》：县南五十里，汤山水经此入梅溪。长三丈，广一丈。乾隆中倪其旋堂建。

8. 通洲桥

《光绪浦江县志稿》：县西南五十里，塔山脚。梅溪水经此入





兰溪。乾隆二十三年倪元征捐造。嘉庆五年洪水冲坏，暂佈木桥。道光三年倪望莲等劝捐重修。

知县方功钺引云：盖闻为倚为约，占利济于行人；成杠成梁，志修完之美政。是则雁齿遥连，无楫不愁乎？野渡鼃身，高峙驱车，免叹夫津迷者矣。邑有通洲桥者，建自乾隆之岁，地当通化之乡，路达兰江，桥居浦地，实车马之冲衢，为往来之要道。上建甘椽之水榭，风雨堪遮；下临百尺之长波，浅深无虑。斯桥之利，洵莫大焉。乃于嘉庆庚申之六月，天雨连绵，山水陡发，津梁尽坏，基址徒存，虽经邑人勉加修葺，然而风吹雨洒，薄板难支，木落冰坚，投输足惧。日暮停驂，谁惜远游之客？霜华印迹，可怜羁旅之人。本县叨宰斯土，念切民瘼，嗤小惠之济人，怀古风于遵道，首捐鹤俸，爰为鳩工。惟是采凿艰而鞭石谁能，工程大而输金尚寡。因诸君之请，特冠数语于前，所望共结胜缘，快成美举，各解五铢之金错，用建十丈之银梁。庶几落成有日，不烦乌雀之填；褰涉无歌，长看彩虹之驾。谨引。同治六年倪允慧等捐葺。光绪十二年合乡筹捐，改木为石。长二十一丈，广一丈八尺，高三丈许，为垛六，为洞五，石栏高四尺。余上建水榭二十一间，中龕观音大士像。费钱一万二千两。

邑人张淥记略：吾浦水源大宗有三：浦阳江发源于西，经流而东，由绍兴三港入海；北曰壶源，出源口入富春江；南则合蜀溪、梅溪诸流，西入兰江而出洲上，此通洲桥所由名也。桥创始与续修详见方公序文。旧制架屋为之，横亘三十余丈，上建水榭，所负既重，且当孔道，易致损坏，都人士恒患之。丙戌春，会酌于广学书院，拟易为石，为一劳永逸之计。僉曰善。即席开



捐,不浹旬,已集资六千余金。虽工繁费大,非巨万不足兴是役,然桥工之大致亦已粗定。越一月而兴工。维时主持全局者,陈君周学也。总司会计者,倪君宪章也。捐收支付弹压工匠以及泛应一切者,则陈君尹罍、道根、文通,倪君安法,陶君君杰,王君章华、克盛,吴君道惠,祈靖之力也。始事于丙戌夏四月,蒇事于丁亥冬十一月,春秋仅一易,而功已告竣。且凉亭、旁屋以及两桥路勘,罔不坚固完好。余忝主书院讲席,诸董事嘱为文记之。自维鄙陋,何足言文?惟诸君奋发有为,洁清自矢,事无不成,成又如是速也。余嘉诸君勇于为善,遂不计词之工拙,而书其颠末如此。是为记。按:此次乐输姓氏暨岁修田亩,刊有《通洲桥志》一卷。

9. 刘源桥

《光绪浦江县志稿》:县南五十里,刘源水经此入梅溪。长五丈五尺,广丈五尺。嘉庆中捐修。上有桥屋。咸丰间重修。

10. 山下桥

《光绪浦江县志稿》:县南五十里,山下庄门前。刘源水经此入梅溪。长十丈,广六尺,里人捐造。

11. 长生桥

《光绪浦江县志稿》:县南五十里,佔坑垅口。长五丈,广一丈。咸丰间捐造。

十 都

1. 永圣桥

《光绪浦江县志稿》：县南三十五里，九龙山水经此。长一丈五尺，广七尺。乾隆二十年里人仇姓捐造。

2. 永镇桥

《光绪浦江县志稿》：县南四十五里，马溪水经此。长四丈，广丈五尺。乾隆十五年里人捐造。

3. 凤仪桥

《光绪浦江县志稿》：县南四十五里，马溪水经此。长三丈五尺，广二丈。乾隆二十八年里人捐造。

4. 破驮堰桥

《光绪浦江县志稿》：县南四十五里，汤山、邵山水经此。长三丈二尺，广五尺。

5. 白佛寺前桥

《光绪浦江县志稿》：县南五十里，汤山、邵山水经此。长四丈，广一丈。光绪戊子年陈尹垦等重修。

6. 张山桥

《光绪浦江县志稿》：县南六十里，龙门水经此。长一丈四



尺,广六尺。

7. 半源桥

《光绪浦江县志稿》:县南五十五里,龙门水经此。长三丈五尺,广丈四尺。汤修益捐修。

8. 永济桥

《光绪浦江县志稿》:县西南五十里,观音庙下。长六丈五尺,广丈一尺。

9. 石板桥

《光绪浦江县志稿》:县西南五十里。长八丈五尺,广五尺。

10. 登瀛桥

《光绪浦江县志稿》:县西南五十里,下泉坂。长□丈,广九尺。光绪十九年陈周学等捐造。

11. 佛堂桥

《光绪浦江县志稿》:县西南五十里。长二丈,广八尺。

12. 前店桥

《光绪浦江县志稿》:县西南五十里,前店村顶。长二丈,广七尺。

13. 新 桥

《光绪浦江县志稿》:县西南五十里。长三丈一尺,广一丈。



14. 判大桥

《光绪浦江县志稿》:县西南五十里。长二丈七尺,广丈一尺。

15. 步云桥

《光绪浦江县志稿》:县西南五十里。长四丈,广丈一尺。光绪壬辰陈周学、陈发祥等重造。

16. 普济桥

《光绪浦江县志稿》:县西南五十里。长四丈五尺,广五尺。同治壬申陈周学修。

17. 石板桥

《光绪浦江县志稿》:县西南五十里。长四丈五尺,广五尺。同治壬申陈周学修。

18. 金兰桥

《光绪浦江县志稿》:县西南五十里,汤山源水经此。长四丈三尺,广一丈。潜长口人造。

19. 报功桥

《光绪浦江县志稿》:县西南五十里。长三丈五尺,广丈二尺。光绪己卯里人捐造。





20. 五龙桥

《光绪浦江县志稿》：县西南五十里，青岩垅口。长二丈五尺，广丈二尺。

21. 樟树桥

《光绪浦江县志稿》：县西南五十里，慈姑寺。长二丈，广一丈。

22. 龙门桥

《光绪浦江县志稿》：县西南五十里。长二丈，广一丈。

23. 真武桥

《光绪浦江县志稿》：县西南五十里，真武庙前。长二丈一尺，广一丈。

24. 关帝庙前桥

《光绪浦江县志稿》：县西南五十里，龙门脚。长二丈五尺，广丈一尺。

25. 协邨外桥

《光绪浦江县志稿》：县西南五十里。

26. 协忠侯庙脚桥

《光绪浦江县志稿》：县西南五十里。

27. 平头桥

《光绪浦江县志稿》:县西南五十里。

28. 跔背桥

《光绪浦江县志稿》:县西南五十里,塔溪垅口。长二丈五尺,广一丈五尺。

以上诸桥,水均入梅溪。

十一 都



1. 两头塘桥

《光绪浦江县志稿》:县南三十里,转轮岩水经此。长丈三尺,广八尺。

2. 宋家桥

《光绪浦江县志稿》:县南三十里,汇洪桥、松柏桥、通津桥三水经此。宋氏建。乾隆三年改木桥。

3. 芝金桥

《光绪浦江县志稿》:县南三十五里。乾隆二十七年造。

4. 下仇桥

《光绪浦江县志稿》:县南三十五里。上二桥,九龙山水经此。



5. 沙溪桥

《光绪浦江县志稿》：县南四十里。长一丈五尺，广六尺。明神宗万历十五年建。顺治间王维忠重修。

6. 石板桥

《光绪浦江县志稿》：县南四十里。

7. 新 桥

《光绪浦江县志稿》：县南四十里，砖砌。长一丈四尺，广七尺。

上三桥，太阳岭水经此。

8. 郑公桥

《光绪浦江县志稿》：县南四十里，黄茅山水经此。长一丈三尺，广五尺。

9. 洪济桥

《光绪浦江县志稿》：县南四十五里，杨坞源水经此。长二丈七尺，广一丈。乾隆十六年汪郁文建。

10. 古石桥

《光绪浦江县志稿》：县南四十五里，田儿坞水经此。长一丈三尺，广五尺。

11. 平头桥

《光绪浦江县志稿》：县南五十里。乾隆三十八年修。

12. 公馆桥

《光绪浦江县志稿》:县南五十里。长一丈五尺,广七尺。
上二桥,太阳岭水经此。

13. 桥头

《光绪浦江县志稿》:县南五十里,杨坞源水经此。长一丈五尺,广七尺。

14. 下箬桥

《光绪浦江县志稿》:县南四十里。长一丈五尺,广八尺。

15. 东仓桥

《光绪浦江县志稿》:县南四十里。长一丈三尺,广八尺。光绪十年捐造。

16. 凸头桥

《光绪浦江县志稿》:县南四十里。长一丈四尺,广八尺。
上三桥转轮岩水经此。

17. 水塘桥

《光绪浦江县志稿》:县南四十里。陈守福建。

18. 后桥头桥

《光绪浦江县志稿》:县南四十里。





19. 外桥头桥

《光绪浦江县志稿》：县南四十里。

20. 红殿前桥

《光绪浦江县志稿》：县南四十里。长丈五尺，广八尺。

上四桥，下吊尖小湾塘水经此。

21. 下蛟老桥

《光绪浦江县志稿》：县南四十里。陈守福建。

22. 蛟老桥

《光绪浦江县志稿》：县南四十里。

上二桥，高竹尖水经此。

23. 岩头桥

《光绪浦江县志稿》：县南四十里。长二丈，广八尺。

24. 前山门前桥

《光绪浦江县志稿》：县南四十里。长二丈，广八尺。

25. 八阁殿脚桥

《光绪浦江县志稿》：县南四十里。长二丈，广八尺。

26. 塘下溪桥

《光绪浦江县志稿》：县南四十里。长二丈，广八尺。

上三桥,椒湖塘水经此。

上诸桥水均入梅溪。

十二 都

1. 通津桥

《光绪浦江县志稿》:县南二十五里。长二丈,广八尺。乾隆三年重修。



2. 永镇桥

《光绪浦江县志稿》:县南二十五里。长一丈八尺,广六尺。乾隆二十六年里人捐造。

上二桥,华藏寺山水经此。

3. 上乌蜀桥

《光绪浦江县志稿》:县南三十里。元顺帝至正中柳贯建。

4. 中乌蜀桥

《光绪浦江县志稿》:县南三十里。长三丈,广七尺。康熙间方姓造。

5. 下乌蜀桥

《光绪浦江县志稿》:县南三十里。长四丈,广一丈。康熙间方姓造。

上三桥,乌蜀山水经此。

6. 孝思桥

《光绪浦江县志稿》:县南四十里,槛溪水经此。长一丈五尺,广一丈。康熙五十七年王君京建,后王氏屡次重修。

上六桥水汇梅溪。

十三 都

1. 戚村桥

《光绪浦江县志稿》:县南三十里,义乌里塘源水经此入浦阳江。长二丈,广一丈。

2. 石斛桥

《光绪浦江县志稿》:县南三十里。义乌永宁乡香山头水经此,入浦阳江。长二丈,广五尺。明神宗万历中建。《吕东莱入越记》:石斛桥溪流潺潺,岸傍大石如屋,西走浦江道也。

3. 定龙桥

《光绪浦江县志稿》:县东三十五里官岩山麓,即下于桥。浦阳江水经此。明万历十七年建。后圯。里人捐造木桥,长二十五丈,广四尺。道光年间复为石,长四十八丈,广八尺。

4. 永济桥

《光绪浦江县志稿》:县东二十五里,钟村下首。木桥。浦阳



江水经此。钟贤浩、贤汉等创立桥会，置田十余亩，以资岁修。

5. 定安桥

《光绪浦江县志稿》：县东三十里，狮子岩下。长四丈，广八尺。咸丰五年圯，任良俊修，光绪十二年捐建。

6. 万年桥

《光绪浦江县志稿》：县东二十五里，钟村门前。里人捐建。

7. 安定桥

《光绪浦江县志稿》：县东二十五里。

上二桥，义乌延寿溪水汇入浦阳江。

十四 都

1. 通济桥

《光绪浦江县志稿》：县东南三十里，隆溪水经此。长三丈一尺，广一丈三尺。乾隆三十一年里人张仕仲建。捐田三亩二分五厘，以资岁修。

2. 惠孚桥

《光绪浦江县志稿》：县东南三十里，隆溪水经此。木桥长十三丈一尺，广三尺。乾隆四十一年里人张仕仲建。捐田三亩三分五厘，以资岁修。





3. 泰平桥

《光绪浦江县志稿》：县东南二十里，治平寺前，澄溪水经此入浦阳江。

附：

泰平桥记

明邑人 郑棠

浦汭东合澄溪入诸暨，陆出乌伤，道经澄溪之上，为东州都会之要津。旧有泰平桥，久圯弗治，四方行旅之往来，恒病涉焉。桥植治平寺门。寺肇建于后唐清泰间，号“清泰寺”。重修于大宋太平兴国中，又改曰“太平”，而造桥于是时，故以名焉。后寺更今名，而桥则仍其旧称也。今其原基湮没，虽乡之耆老亦鲜有知者矣。寺僧有慈韵师者，一日游于溪之上，慨然语徒众曰：“桥之兴废，实系寺之隆替，自斯桥之毁，而道路四穿旁午，于风水家为冲射气走之忌。虽吾空门不作是念，而佛以慈悯为心，所谓桥梁居八福之一，亦吾徒所宜先也。此而弗治，则寺为无人矣！”乃捐衣鉢，倡众庀工重建之。累石层甃其趾，又聊构列屋其上，架木平版其面，而栏槛其两旁。行者无涨潦漂溺之虞，负荷往来，举皆平步安行矣。厥功告成，适余谒告归展先人莹域，道经澄溪，过而憩焉。韵师邀余入，欲求文以记。余旧与山中云讲师相善也。曩师修整观行，以仪范后学，攀慈航望彼岸者，前后相继。其徒怒上人，今往持杭之报国寺，亦能兴旧起废，有声宗门。韵师亦云公徒也，侍讲下为最久，又能宏师法旨，成利济之业，以便来者。云公之道信得所传矣。且云与韵同出戚氏名族，兼通吾儒，文学词翰俱善，宜其以振扬宗风。余喜欲为之书，时未暇也。

是年冬,朝廷普建大功德道场,韻师因召来京师,复申前请。余用是备述桥之废兴所自,告诸其徒,俾闻风而兴,起齐一其心,将见金碧其栋宇,次第有造就矣。时惟一桥之重建云乎?窃观天下名蓝胜刹,每鱼鼓寂然,由住持非其人也。使咸若云讲师之徒居之,不止报国名刹有成而已,将无往不有为也。因并记诸桥石,信余言之后验云。后无寺僧续修,桥圯。里人捐造木桥,长十有余丈。纠会置产,以资岁修。

4. 上 桥

《光绪浦江县志稿》:县东二十里,纱帽滩,木桥。长二十余丈。道光十四年,黄蔚助田五亩二分五厘。咸丰三年,李西亭助田地十亩零。同治间添约一会,以助岁修。光绪初又捐渡船一只。

5. 中 桥

《光绪浦江县志稿》:县东二十里,纱帽滩,木桥。长二十余丈。

6. 下 桥

《光绪浦江县志稿》:县东二十三里,纱帽滩,木桥。

上三桥,浦阳江水经此。



十五 都

1. 相公桥

《光绪浦江县志稿》：县东南十五里，义乌鲤鱼山水经此。长二丈，广八尺。嘉庆庚午年杨里公建。

2. 永福桥

《光绪浦江县志稿》：县东南十五里，演水源水经此。乾隆三年僧里礼募建。

3. 水碓桥

《光绪浦江县志稿》：县东南十八里，桃溪水经此。雍正七年僧文源募建。

上三桥水汇于浦阳江。

4. 万春桥

《光绪浦江县志稿》：县东南十五里，浦阳江经此。木桥长十五丈。

5. 永和桥

《光绪浦江县志稿》：县东南十五里，湖山家边。浦阳江水经此。木桥长十丈。



十六 都

1. 百世桥

《光绪浦江县志稿》：县南十里，白石源水经此入湖山。长六丈，广七尺。乾隆元年建。

2. 新 桥

《光绪浦江县志稿》：县南十里，白石源水经此入湖山。长二丈，广五尺。乾隆二十一年修。



3. 富墅桥

《光绪浦江县志稿》：《薛志》作富仕桥。县东南十里。大王岭水经此入浦阳江。

4. 大圣桥

《光绪浦江县志稿》：县南十里，大王岭水经此入浦阳江。长二丈余，广一丈。元张一清建。

5. 马林桥

《光绪浦江县志稿》：县南十里，南山水经此入湖山。长二丈五尺，广七尺。乾隆二十年修。

6. 杨资桥

《光绪浦江县志稿》：县东南十五里，白石源水经此入湖山。

7. 浦阳东桥

《光绪浦江县志稿》：县东南三十里。见《府志》。今废。

8. 兴隆桥

《光绪浦江县志稿》：县南十里，槁溪水经此。

十七 都

1. 罗汉桥

《光绪浦江县志稿》：县东二十里。长四丈八尺，广一丈二尺。《旧志》：向有巨石屹立溪中，相传为罗汉所摄。即石造桥，因名。

2. 山 桥

《光绪浦江县志稿》：县东四十里。后废。乾隆二十六年改造木桥。

3. 罗同桥

《光绪浦江县志稿》：县东二十六里。长一丈八尺，广五尺。

4. 永仙桥

《光绪浦江县志稿》：县东北二十五里，刘笙。长二丈一尺，广七尺。咸丰辛酉建，光绪壬辰重修。



5. 永镇桥

《光绪浦江县志稿》:县东北二十四里,八石。长二丈二尺,广九尺。咸丰辛酉陈荣锦造。光绪九年黄林宴重修。

6. 李公桥

《光绪浦江县志稿》:县东北二十三里,何店。长二丈八尺,广七尺。道光辛丑李圣照造。

7. 望安桥

《光绪浦江县志稿》:县东北二十三里,何店。长五丈九尺,广八尺五寸。

上七桥,左溪水经此入江。

8. 双溪桥

《光绪浦江县志稿》:县东北二十里,何尚山。长二丈一尺,广六尺。光绪辛卯张永起造。

9. 盛村桥

《光绪浦江县志稿》:县东北二十里。长二丈一尺,广六尺,道光辛丑陈宗义造。

10. 下溪桥

《光绪浦江县志稿》:县东北二十五里,盛村。长二丈,广五尺。陈永盈造。





11. 一山桥

《光绪浦江县志稿》：县东北二十五里，盛村。长一丈八尺，广四尺。陈光开造。

12. 永安桥

《光绪浦江县志稿》：县东北二十五里，田来。长一丈五尺，广四尺。光绪八年张锡蕃重修。

13. 永济桥

《光绪浦江县志稿》：县东北二十五里，田来。长一丈八尺，广九尺。陈世孝造。

14. 双溪桥

《光绪浦江县志稿》：县东北二十二里，里张。长二丈一尺，广八尺。嘉庆二年张汉林造。

上七桥，西源水经此入左溪。

15. 保安桥

《光绪浦江县志稿》：县东北二十一里，夏泉。长六丈，广丈二尺。咸丰年间黄几旦造。

16. 久长桥

《光绪浦江县志稿》：县东北二十里。双溪口，界十八都地。长六丈二尺，广丈二尺。道光癸未王有起妻陈氏造。光绪丙子

王一声重修,壬辰贾黄氏重修,西边加圜门一座。

上二桥,左溪水经此。

17. 青云桥

《光绪浦江县志稿》:县东十六里,后严家边。长二丈二尺,广一丈。

18. 望江桥

《光绪浦江县志稿》:县东十五里。长一丈八尺,广五尺。道光元年倪圣儒造。



19. 上头桥

《光绪浦江县志稿》:县东十五里,山下店。长二丈七尺,广九尺。

20. 下头桥

《光绪浦江县志稿》:县东十五里,山下店。长二丈六尺,广九尺。

21. 永头桥

《光绪浦江县志稿》:县东十五里,官山头。长三丈一尺,广九尺。

22. 阔板桥

《光绪浦江县志稿》:县东十四里,牛轭_查。长二丈七尺,广

九尺。光绪十五年陈宗涓造。

上六桥，出迹源水经此。

23. 瑞川桥

《光绪浦江县志稿》：县东十二里，马墅。长五丈，广八尺。光绪癸巳捐造。

24. 寿星桥

《光绪浦江县志稿》：县东十二里，马墅南。长四丈二尺，广一丈二尺。咸丰三年高国泰造。

上二桥，田坞水经过。

25. 湖 桥

《光绪浦江县志稿》：县东十五里，湖桥。长三丈，广丈二尺。道光间里人捐造。

26. 廻抱桥

《光绪浦江县志稿》：县东十五里，西溪家边入浦阳江。长一丈八尺，广八尺。

上二桥，出迹、田坞二源水经此。



十八 都

1. 左溪桥

《光绪浦江县志稿》：县东二十里，芳地口。长十一丈五尺，

广一丈一尺。有石栏。道光十七年黄几旦造。

2. 义济桥

《光绪浦江县志稿》：县东十八里，三步石。木桥。长十三丈。光绪间，捐田二石七斗五升，地三石八斗七升，以资岁修。亭三间，基地陈桂荣助。

3. 固安桥

《光绪浦江县志稿》：县东十八里。俗呼洪公桥，即《旧志》王公桥。僧应真献募并庵重建。长十丈余，广丈余。乾隆三十八年为洪水所坏。四十一年，知县薛鼎铭倡捐重建，改今名。

附：

重建固安桥记

严炳元

浦邑东乡与绍郡之诸暨接壤，为省行孔道。距城十五里有大溪，源出大岭两山间，合流而下，入左溪。是溪受左溪之水达浦阳江，故溪流为最猛。每骤雨势，辄淖滴奔扬，其疾如矢。溪之上有桥，桥圜三门，袤十余丈，广丈余。按《旧志》称为王公桥，僧应真献募建，而土人则呼之以洪公。洪公者，土音之讹也。诎王公为倡而专其美耶？抑真献承令王公而归美之耶？访其遗迹，无记载碑碣可考，莫能辨焉。余于癸巳蒞和之杪，由山左齐东令司铎。是邦渡此桥，深相讶曰：“桥之袤且广者，仅泽国有之，不谓山区亦犹是也。”越旬有八日，薛侯鼎铭奉简命清治。甫下车，适梅雨滂沱。积三昼夜，流水横流，桥不能御，遂以圯。举





畴襄所磊巨石，水尽挟之，以沸腾不知所往。于时四境内田稼，凡濒溪者，不无偏裨。侯出廉，遍加抚恤。属余佐之散给。余复经其地，桥固荡然，又溪当冲决之余水益深浚，恃有竹筏舣其旁，乘之以济，而民乃群歌匏叶矣。比年以来，时和岁稔，风俗恬熙。侯于数百年湮坠之事，皆起而振兴之。一日，于武林归途，见往来行人，虽已架木成梁，差可徒步，然苦于逼窄未坚，喟然发慨，谓：“是亦为政之要务也，何可任其久废乎？”遂首捐金累百。其有未足，则襄以众力，共计费千四百余。遴邑人汪君仲宪为之董，率工始于丙申之二月二十四日，迄于丁酉之某月某日。其桥之袤且广如故。既成，题其柱曰“固安”。嗟夫！昔之以“王公”名桥者，非专美于一己，即归美于一人，或未免私其功也。今侯之所命，志在苞桑，不复求著其姓氏。顾名思义，殆冀邑之人，有享利济有美勿居者耶？是为记。

4. 祝清桥

《光绪浦江县志稿》：县东十八里，毛尤堰下。木桥。长十丈余。李圣照造。又捐田十亩，以资岁修。

5. 广德桥

《光绪浦江县志稿》：县东二十里，桐木殿西边。《薛志》：木桥。名八合桥。道光间改建石桥。长十丈，后圯。光绪壬午捐建，改今名。

6. 澄溪桥

《光绪浦江县志稿》：县东二十里，上店。木桥。长十五丈。

上六桥汇左溪水入江。

7. 金 桥

《光绪浦江县志稿》：县东二十里，俗呼金洞溪。三圣岩水经此。乾隆间造。

8. 高 桥

《光绪浦江县志稿》：县东二十里。木桥。长十三丈。左溪水经此入江。



十九 都

1. 寿安桥

《光绪浦江县志稿》：县东北三十里，泥都家下。大竺岭水经此。长一丈四尺，阔丈二尺。道光□年黄几旦造。

2. 共乐桥

《光绪浦江县志稿》：县东北三十里。长二丈，广六尺。

3. 利涉桥

《光绪浦江县志稿》：县东北三十里。长四丈，广一丈。

4. 永和桥

《光绪浦江县志稿》：县东北二十八里，石母岭脚。道光间王守振造。光绪癸巳圯，洪兆谱重修。长二丈七尺，广一丈二尺。



5. 太平桥

《光绪浦江县志稿》：县东北二十九里。长三丈，广一丈。

6. 宝龄桥

《光绪浦江县志稿》：县东北二十八里。长三丈五尺，广丈二尺。

7. 永乐桥

《光绪浦江县志稿》：县东北二十七里，石母岭脚。长二丈七尺，广丈五尺。

8. 镇龙桥

《光绪浦江县志稿》：县东北二十六里，淡竹岭水经此。乾隆三十八年洪水冲坏，四十年重建。长四丈五尺，广一丈四尺。桥头有启明亭。

9. 大桐桥

《光绪浦江县志稿》：县东北二十五里，淡竹岭水经此。长二丈四尺，广一丈。

10. 永镇桥

《光绪浦江县志稿》：县东北二十四里。长四丈四尺，广丈三尺。

11. 驄马桥

《光绪浦江县志稿》：县东二十三里。长五丈，广六尺。后

废,改建木桥。

12. 祝家桥

《光绪浦江县志稿》:县东二十二里。被水冲坏,周士芳重造。

13. 履安桥

《光绪浦江县志稿》:县东二十二里。长五丈二尺,广丈三尺。乾隆二十九年王志枫造。后圯。



14. 旭升桥

《光绪浦江县志稿》:县东二十二里,王梅岭脚。合前黄溪入江。长二丈,广七尺。后圯。乾隆三十八年王志枫重建。

上三桥,石郭源水经此入江。

15. 保安桥

《光绪浦江县志稿》:县东二十三里。长三丈四尺,广丈八尺。

16. 永济桥

《光绪浦江县志稿》:县东二十五里,樟桥头寺后源水所经。

二十 都

1. 石六桥

《光绪浦江县志稿》：县东四十里，于店门前。

2. 观 桥

《光绪浦江县志稿》：县东四十里。长二丈，广一丈。

3. 永济桥

《光绪浦江县志稿》：县东四十五里，钟宅门前。乾隆二十八年吴一玖造。

上三桥，筱溪水经此入龙溪。

二十一 都

1. 合溪桥

《光绪浦江县志稿》：县东四十里，何石塔。木桥。长二十余丈。有渡船一只。桥头亭一座。

2. 浦暨桥

《光绪浦江县志稿》：县东五十里，上宣。木桥。长二十余丈。道光年间捐造。今有义渡一只。

上二桥，浦阳江水经此。



3. 龙门桥

《光绪浦江县志稿》：县东四十五里，费里坞水经此入江。长二丈五尺，广丈二尺。光绪年间捐造。

二十二 都

1. 羊角桥

《光绪浦江县志稿》：县东三十五里。长二丈，广一丈。乾隆三十八年徐宗信造。



2. 破 桥

《光绪浦江县志稿》：县东三十五里。长一丈六尺，广八尺。乾隆三十八年邵士玉造。

3. 石金桥

《光绪浦江县志稿》：县东三十五里，嵩溪村右。长二丈四尺，广一丈。乾隆二十八年徐德化造。

4. 利济桥

《光绪浦江县志稿》：县东三十五里，嵩溪村南。长三丈四尺，广二丈。乾隆二十五年建。道光八年里人重修。

5. 太平桥

《光绪浦江县志稿》：县东三十五里，嵩溪村口。长三丈，广

一丈。乾隆三十八年徐宗信建。道光甲辰里人重修。上有亭，曰望川。

6. 任村桥

《光绪浦江县志稿》：县东三十三里。长二丈八尺，广八尺。嵩溪源口距孝门桥三里许。咸丰甲寅张善房造。光绪□年善大、善亚两房合修。

上六桥，嵩溪源水所经，至独山入江。

7. 汀步桥

《光绪浦江县志稿》：县东四十里，大田沿。长二丈四尺，广五尺。

8. 佇月桥

《光绪浦江县志稿》：县东四十里，旌坞。长二丈四尺，广七尺。道光壬辰贾应彪妻何氏重修。

9. 拱翠桥

《光绪浦江县志稿》：县东四十里，旌坞祠前。长三丈，广二尺。合村建。

10. 宁远桥

《光绪浦江县志稿》：县东四十里，旌坞。长四丈二尺，广丈四尺。乾隆辛巳年捐建。



11. 夏宅桥

《光绪浦江县志稿》:县东四十里。

12. 里新桥

《光绪浦江县志稿》:县东四十里,旌坞村南。长三丈四尺,广丈三尺。光绪庚辰重建。

13. 永远桥

《光绪浦江县志稿》:县东四十里,贾保坞口。长二丈,广七尺。嘉庆庚申建。

14. 里新桥

《光绪浦江县志稿》:县东三十五里,内坞门前。长三丈六尺,广丈二尺。光绪六年修。

15. 外高桥

《光绪浦江县志稿》:县东三十五里,横溪。长三丈六尺,广一丈。

16. 里平桥

《光绪浦江县志稿》:县东三十五里,横溪。长二丈九尺,广九尺。

17. 永平桥

《光绪浦江县志稿》:县东三十三里,横溪。长二丈四尺。乾



隆三十四年造,光绪八年重修。

18. 贾保坞口桥

《光绪浦江县志稿》:县东四十里。长一丈六尺,广八尺。即贾村桥。

上诸桥,旌坞源水经此入江。

19. 通州桥

《光绪浦江县志稿》:县东四十里,官田庄西。长三丈五尺,广九尺。光绪癸巳,贾志山等捐建。

20. 天官桥

《光绪浦江县志稿》:县东四十里。柴坞、旌坞两源水合流经此。

21. 天中寺桥

《光绪浦江县志稿》:县东四十里,碧溪水经此。长一丈四尺,广九尺。

21. 鲍 桥

《光绪浦江县志稿》:县东四十里,傅宅。碧溪水经此。长二丈五尺,广八尺。乾隆三十九年修。

22. 新安桥

《光绪浦江县志稿》:县东四十里,鸡冠岩水经此入江。长丈



九尺,广九尺。

23. 惠济桥

《光绪浦江县志稿》:县东三十五里,即新桥头。浦阳江水经此。旧有石桥,毁于水。乾隆末年,二十都吴、孝门桥张合造木桥,十余丈。有岁修田。粤匪扰后,桥坏。光绪十八年吴姓□□公派下,张姓景青、荐青、河三、锡鏊等捐钱重造。

24. 白马桥

《光绪浦江县志稿》:县东四十五里,下柳溪水经此入江。长一丈七尺,广八尺。乾隆四年僧涤凡募建。



二十三 都

1. 麟溪桥

《光绪浦江县志稿》:县东二十五里,玄麓山水经此入江。长二丈,广八尺。乾隆四十年郑敦素公修。

2. 崇义桥

《光绪浦江县志稿》:县东二十五里。长二丈余,广一丈。

3. 义门桥

《光绪浦江县志稿》:县东二十五里。木桥。长二十丈,乾隆十八年重造。

上二桥,寺后源水经此入江。

4. 白麟溪桥

《光绪浦江县志稿》:县东二十五里,玄麓山水经此入江。长六丈,广一丈。乾隆四年修。

5. 旌孝桥

《光绪浦江县志稿》:县东二十五里。木桥。长六丈,广九尺。

6. 旌义桥

《光绪浦江县志稿》:县东二十五里。木桥。长六丈,广九尺。

7. 眉寿桥

《光绪浦江县志稿》:县东二十五里。长六丈,广一丈。乾隆五年修。

8. 通輿桥

《光绪浦江县志稿》:县东二十五里。长三丈,广一丈,乾隆五年修。

9. 义成桥

《光绪浦江县志稿》:县东三十里。木桥长三十丈,浦阳江水



经此。曹□□妻□氏同婿严定台修。光绪十八年张时纶修。又有渡船,张鞠堂造,并捐田五亩,以资岁修。

10. 永济桥

《光绪浦江县志稿》:木桥旧名甄村桥。县东三十里,浦阳江水经此。长二十余丈。义门郑国锦造。又有田助。匪后,田芜桥坏。同治四年,陈凤飞劝捐再造,并置田亩,以资岁修。葛继熟又捐造渡船,以济行者。

11. 孝门桥

《光绪浦江县志稿》:县东三十里,嵩溪水经此入江。长三丈余,广八尺。相传为颜孝子屋后门。以浦江未置县,地属乌伤也。国朝乾隆十九年张以儒、守熙重修。

二十四 都

1. 杭口桥

《光绪浦江县志稿》:县北十五里,《旧志》:岩坑山水所经,桥圯。明世宗嘉靖中,张元京建石梁。国朝顺治中朱智亨募建,改名太平桥。乾隆六年吴涟等募捐重建。长八丈,广八尺。

2. 二楼桥

《光绪浦江县志稿》:县北十五里,大楼、小楼二源水经此。康熙五十七年吴德谔募建。长三丈,广五尺。光绪二年洪水冲坏,吴声治、声诰等重建。





3. 登云桥

《光绪浦江县志稿》：县北十五里。长二十四丈，广丈三尺。光绪十五年吴朝林、张狮岩等募建。

4. 西 桥

《光绪浦江县志稿》：县北三十五里，大岩岭水经此。

5. 后杨桥

《光绪浦江县志稿》：县北三十五里，高塘岭水经此。长二丈，广八尺。

6. 竹槛桥

《光绪浦江县志稿》：县北四十五里，竹槛岭脚。壶源水经此。长二丈，广一丈。同治十三年周为日建。

7. 通济桥

《光绪浦江县志稿》：县西三十二里。长三丈，广丈二尺。道光十年周仁广募建。同治三年周以蕙重修。

8. 惠政桥

《光绪浦江县志稿》：县西北十八里。长十丈，广一丈。东岭源水经此。道光二十二年石姓捐建。

9. 仁寿桥

《光绪浦江县志稿》：县西北二十里，截柘岭、高塘岭水经此。

长四丈,广一丈。咸丰九年石福寿捐建。

10. 德政桥

《光绪浦江县志稿》:县西北二十三里。长五丈,广丈五尺。
光绪三年张狮岩募建。

上三桥,曹源水经此入湖源。

11. 如升桥

《光绪浦江县志稿》:县西北二十五里,殿口。长四丈,广二丈。咸丰八年里人捐造。

12. 永福桥

《光绪浦江县志稿》:县西北二十八里。长三丈五尺,广丈二尺。道光二年周为本建。光绪十五年周仁永重修。



二十五 都

1. 古名镇桥

《光绪浦江县志稿》:县北二十五里,虞宅源水经此。长三丈,广一丈。高山寺僧恒广建。

2. 席场桥

《光绪浦江县志稿》:县北三十里,壶溪水经此。宝庆初,毛日严建后重修。长十丈五尺,广丈四尺。

附：

席场桥记

宋 林子燕

聚席场桥者几百家，山为垣，溪为阍也。溪沿群山，斗折蛇行，迢迢三里。居民视广狭，编木以渡，激辄坏，退复作，安习苟简久矣。今天子践极元年，毛君日严捐帑廩，鳩匠石，创桥于往来之津。长二十八丈，广一丈八尺。翼以栏楯，镇以鱼虎，计工四万有奇。越三年，桥成。气甚吞压，杰然卧龙卧虹，浴沧溟、跨碧落也。或见之曰：“伟哉，是郡邑所以迎轩盖、游士女者，而独以伴溪山耶？”君笑曰：“此谓不一于汝而二于物也。试为子诵之：林薄幽深，砂磧清浅，即其境，桑麻肥焉；抚而人，樵牧错焉。袂褰网罟芥其上，薪樗藁秸藉其侧，狼狐猿狖出驰入息，云飞雾霏，朝幄暮暮；当是时，予为桥惜，恨其不在于都邑间也。惊涛怒涨，熊斗虎哮，触巉岩，掠断岸，饮飞敛衽，孟贵盛容，而童孺羸老扶筇掉臂，升梁而浩歌，临流而思逝，谈黄瓮之回湫，笑滟潏之险怪；当是时，子为桥喜，又幸其在溪山间也。夫桥一之，子二之，子则易景而与感，桥不择地而售利。吾能推爱山溪之心而爱郡邑，予复推爱郡邑之心而爱山溪，则几矣。”余闻而高之，曰：“君利人本其仁，制事本其勇，不宝货财本其廉，能通人情本其恕。本是四者，可以观人矣！”宝庆丁亥清明记。《薛志》按：桥梁卷席场桥，系宋宝庆初年建，记中所云“今天子践极”，正理宗宝庆元年也。《旧志》讹作“宝隆丁亥”，丁亥即宝庆三年，今改正。



3. 永安桥

《光绪浦江县志稿》:西溪口。长三丈五尺,阔丈三尺。

4. 永济桥

《光绪浦江县志稿》:黄埂堰头。板桥。长七丈二尺,阔八尺。灵岩公派下助。

5. 镇东桥

《光绪浦江县志稿》:茜溪朱宅祠前。长九丈,阔丈三尺。乾隆己丑灵岩公造。



6. 大王潭桥

《光绪浦江县志稿》:县北二十里,截柘岭水经此。乾隆六年僧恒广建。《薛志》作二十四都。

7. 保元桥

《光绪浦江县志稿》:县北二十里,金坑岭北水经此入湖源。长一丈二尺,广五尺。光绪六年吴声诰造。

二十六 都

1. 驼背桥

《光绪浦江县志稿》:县北二十五里。长二丈,广七尺。



2. 狮子桥

《光绪浦江县志稿》：县北二十五里。长二丈，广六尺。

3. 獬龟桥

《光绪浦江县志稿》：县北三十五里。长二丈，广七尺。

4. 府富桥

《光绪浦江县志稿》：县北三十五里。长二丈，广八尺。

上四桥，清溪水经此入湖源。

5. 清溪口桥

《光绪浦江县志稿》：县北三十五里，东、西两源水经此入湖源。长二丈六尺，广六尺。陈元灵造。

6. 兴隆桥

《光绪浦江县志稿》：县北四十五里。长一丈六尺，广九尺。光绪十五年毛一功重建。

7. 会龙桥

《光绪浦江县志稿》：县北四十五里。长二丈，广八尺。陈兴祥造。毛一洪重修。

上二桥，白岩岭水经此。

8. 永安桥

《光绪浦江县志稿》：县北五十里，白岩岭水、乔竹岭南水经

此入湖源。光绪年间陈仕行捐造。

9. 逸山桥

《光绪浦江县志稿》：县北五十里，寺前。陈心周造。

10. 青龙桥

《光绪浦江县志稿》：县北五十里，寺前。陈伯佩造。

11. 亚咸桥

《光绪浦江县志稿》：县北四十八里，长举坞水经此入湖源。长三丈，广八尺。道光癸巳陈亚咸造。

12. 永镇桥

《光绪浦江县志稿》：县北七十里，大姑源水经此。长四丈九尺，广丈八尺。咸丰元年郑尔元造。

13. 通济桥

《光绪浦江县志稿》：县北四十里，小姑源水经此。长七丈，广丈五尺。嘉庆壬申年捐造。

14. 永乐桥

《光绪浦江县志稿》：县北三十五里，小姑源水经此。长四丈，广丈二尺，咸丰八年郑尔元造。光绪三年郑云山修。





15. 望祖桥

《光绪浦江县志稿》：县北三十里，大、小姑源水经此入湖源。长六丈，广九尺。嘉庆十二年捐造。

16. 百岁桥

《光绪浦江县志稿》：县北三十五里，白岩山前。大、小姑源水经此入湖源。长十五丈，上有慈悲殿。嘉庆己卯陈以佩造。

17. 同乐桥

《光绪浦江县志稿》：县北三十五里，湖源水经此。长二十五丈，广丈四尺。原名广德。道光二十年陈荣典、荣迥等捐建。后圯。咸丰年间黄几旦重建，改今名。

18. 广安桥

《光绪浦江县志稿》：县北四十里，上河。湖源水经此。嘉庆年间陈祖奎、祖启等捐造。邑人朱寓记。

19. 鉴湖木桥

《光绪浦江县志稿》：县北五十里，壶源水经此。长二十余丈，即汀步桥。乾隆三十八年造。

20. 镇湖桥

《光绪浦江县志稿》：县北五十三里，湖源水经此。长三十丈余。道光二十九年里人捐造。

21. 黄檀坑口桥

《光绪浦江县志稿》：县北四十里，黄檀水经此入湖源。长一丈九尺，广九尺五寸。

22. 承先桥

《光绪浦江县志稿》：县北四十五里，何坞源水经此入湖源。长丈九尺。陈貽燕堂造。光绪壬辰圯。癸巳陈时风重建。

23. 广济桥

《光绪浦江县志稿》：县北四十六里，圭坑古寺口。长六丈，阔丈八尺。罗家宇、家廷、家本，王有明、毛为聚等募建。

24. 圭坑口桥

《光绪浦江县志稿》：县北四十六里，圭坑源水经此入壶溪。长六丈五尺，广丈二尺。康熙丙子陈元仁修。

25. 明两桥

《光绪浦江县志稿》：县北六十里，黄绫源水经此入湖源。长六丈，广丈余。乾隆间周学明造。道光甲午圯。今造木桥。

26. 韦抗桥

《光绪浦江县志稿》：县北七十里，罗家下首。圭坑源水经此。长四丈，广八尺五寸。



二十七 都

1. 康济桥

《光绪浦江县志稿》：县北六十里，下毛店上首。

2. 盘溪木桥

《光绪浦江县志稿》：县北五十里。

3. 水口木桥

《光绪浦江县志稿》：在盘溪村下。

4. 水口桥

《光绪浦江县志稿》：长二丈六尺，阔丈一尺。周绍兰造。

二十八 都

1. 冷坞桥

《光绪浦江县志稿》：县北五十里。

2. 镇罗桥

《光绪浦江县志稿》：县北五十里。长一丈四尺，广八尺。光绪癸巳建。

上二桥，淡竺岭北水经此入壶源。





3. 佛堂店桥

《光绪浦江县志稿》:县北五十五里。

4. 三堡桥

《光绪浦江县志稿》:县北五十八里。长二丈,广四尺。

5. 洞 桥

《光绪浦江县志稿》:县北五十七里,栖云洞脚。

6. 高 桥

《光绪浦江县志稿》:县北五十六里。

7. 中余桥

《光绪浦江县志稿》:县北六十里。

8. 方家桥

《光绪浦江县志稿》:县北六十三里。长一丈五尺。

9. 周公桥

《光绪浦江县志稿》:县东北六十六里。《旧志》:迢遂山水所经。

上七桥均乔竺岭南水经此入壶源。

10. 寺坞桥

《光绪浦江县志稿》:县东北七十五里。长丈四尺,广八尺。



11. 贾村桥

《光绪浦江县志稿》：县北八十里。长丈六尺，广八尺。唐坞人捐造。

12. 九堡桥

《光绪浦江县志稿》：县北八十里。长二丈，广一丈。光绪己丑水冲坏。龙门山人改造木桥。

13. 界牌桥

《光绪浦江县志稿》：县北八十五里，廿八、廿九都交界。上四桥，乔竺岭北水经此入壶源。

14. 高 桥

《光绪浦江县志稿》：县北八十里，石门水经此。宋孝宗淳熙中戴良绪建。按：石门水在廿九都。《旧志》误。

二十九 都

1. 西坂桥

《光绪浦江县志稿》：县北九十里。

2. 横板桥

《光绪浦江县志稿》：县北九十里。

上二桥,芎头源水经此。

3. 连塘桥

《光绪浦江县志稿》:县北九十里,洋塘湖水经此入诸暨。

4. 太平桥

《光绪浦江县志稿》:县北九十里,洋塘湖百宅源水经此。长二丈四尺,阔八尺。



5. 新 桥

《光绪浦江县志稿》:县北九十里。长四丈,广五尺。

6. 万安桥

《光绪浦江县志稿》:县北九十里。长丈四尺,广九尺。

7. 荷苞桥

《光绪浦江县志稿》:县北九十里。长三丈四尺,广七尺。同治三年张宏元、董正法同造。

上三桥,芎头源洋塘湖水经此。

8. 石门桥

《光绪浦江县志稿》:县北一百里。长二丈六尺。



9. 合溪桥

《光绪浦江县志稿》：县北一百里。长丈四尺。光绪十五年陈春书等捐修。

10. 派溪木桥

《光绪浦江县志稿》：县北九十里。长七丈，广四尺。
上三桥，石门坞水经此。

11. 峡山桥

《光绪浦江县志稿》：县北九十里。

12. 镇东桥

《光绪浦江县志稿》：县北九十里。长二丈八尺，广六尺。咸丰七年许公乾造。

上二桥，乔竹岭北水经此。

13. 定安桥

《光绪浦江县志稿》：县北九十里。长一丈八尺，广九尺。道光二十一年费学丰造。

14. 顺成桥

《光绪浦江县志稿》：县北九十里。长丈四尺，广八尺。康熙戊戌年造。



15. 方口桥

《光绪浦江县志稿》：县北八十六里。长丈六尺，广七尺。

上三桥，山和岭水经此。

16. 孝义桥

《光绪浦江县志稿》：县北八十七里，乔竹岭北水经此。长五丈六尺，广七尺。咸丰九年费宏贤、张宏元造。

17. 了溪木桥

《光绪浦江县志稿》：县北九十城。洋塘、芎头、石门、上河诸源水经此。长十余丈，广五尺。

18. 东 桥

《光绪浦江县志稿》：一名七松桥。县北九十里，与三十都界。金竹坑水经此入建溪。长一丈八尺，广六尺。乾隆己酉戴林造。

附：

东桥记

戴殿泗

乾隆己酉冬，从叔乐清氏重建石桥于东坑。是桥也，在戴氏居宅西隅，其溪源自九灵山右腋，蜿蜒曲折，西南流以合于建溪。桥在西，而称曰东，从其旧也。溯厥名称，知桥之由来远矣。昔李唐之末，先祖镇抚公自杜陵来，曰马建里，今之西宅是也。故此桥曰马建桥。以宅视桥在其东方，则又曰东桥。汴宋以来，科



第继起,皆居西宅。元初,十二世祖锡公始营居桥上。于是,东西二宅相为辉映:其东,则九灵山人院使公之居也;其西,则黄州知府子迂公之第也。明中叶以后,西居渐替,则移马建里之名于溪东,若不知西宅之祖居也者。独是桥自唐迄今,阅九百余年而名不改。知桥之由来远,即知戴氏之世德长。由今追昔,一举足,而动人水源木本之思矣。先是桥圯于水,或束板代之。吾叔始易之以石,鸠工命材,坚致巩固,可垂诸久远。往来者咸属余记之。余考戴氏之先,有尧民氏者,世以积德济人为务,谱称其修造桥梁至五十余处。吾叔敦笃之行冠于乡闾,好施之诚出于天性,是桥特其一节也。其殆承奕世之流风而兴起者哉。因推原先德,而谨书之。是为记。光绪己丑戴兴蔚等重修。

三十 都

1. 让溪桥

《光绪浦江县志稿》:县北九十三里,建溪水经此入湖源。长四丈余,广八尺。有岁修义产。

2. 聚石岩下桥

《光绪浦江县志稿》:县北九十四里,建溪水经此入湖源。长四丈余,广八尺。光绪乙未倪光洪等捐造。

3. 小溪口木桥

《光绪浦江县志稿》:县北九十里,小溪水经此入湖源。长五

丈余,广五尺。

4. 鹰嘴滩义渡

《光绪浦江县志稿》:县北九十里,壶源溪水经此。

以上诸桥,木桥则标出,余皆石桥。一都至五都、十三都至二十三都,水皆入诸暨;六都至十二都,水皆入兰溪;二十四都至三十都,水皆入富阳。



附:1. 浦阳十景

十咏图总说

邑之有十咏久矣。乡先达足音所及,耳谋目遇,忽焉意惬,率属诸翰林子墨以传之。人揽其文时,复领卧游之趣。此地烟霞泉石,虽可胜穷。缘旧题,取数止,此辄用图形于影而为之说焉。兴发而一披会心处,故不远耳。



十景一 仙华岩雪图说

十景圖總說
 邑之有十詠久矣柳先達足音所及耳詳目過其地
 屬諸翰林子臺以傳之人攬其文時復領外遊之趣此地
 實泉石難可勝窮緣舊題數止此報則前於此而為之
 說馬與柱而一披會心處故不遺耳




仙華巖雪圖說
 青山一夜白屋千家以淨聰明無此最勝者又况旗峰劍
 間即英草靈禽未知此時又在何處其玉京耶將云漢耶目
 眩者久之益歎雖復人寰別有天地已



江溪泉水利專輯

青山一夜，白屋千家。以淨聰明，無此最勝者。又况旗峰、劍峽間即异草灵禽，未知此时又在何处。其玉京耶？将云汉耶？目眩者久之，益叹虽复人寰别有天地已。仙华岩在县北十里，翠掌浮空，雪景尤奇。

十景二 白石湫云图说



湫在白石之腰，祷无不应。盖蛟龙窟也。命曰“灵泽”。每春秋早暮，鸿濛弥漫，仿佛有夭矫连蜷出没，隐见于其中者。深山大泽是生神物，信哉。为龙之乘，为云之从，其何自辨之。白石山在县东南十里。

十景三 龙峰古塔图说

龍峰古塔圖說

龍峰古塔圖說
三
浮圖火且百年而突兀於龍峰如故。玲瓏峭拔，雖數十里外莫不見之。其下龍德寺，右抱東溪，俯仰其間，超超徑路，絕風雲通矣。



浮图火且百年，而突兀于龙峰如故。玲珑峭拔，虽数十里外莫不见之。其下龙德寺，右抱东溪，俯仰其间，超超径路，绝风云通矣。龙峰山在县东里许，上有古塔。

十景四 宝掌冷泉图说

寶掌冷泉圖說
 地有山，山出泉，無處無之。此則唐千歲禪師得道處也。泉涌自飛來，甘冽無比，則未知煎茶水記品居第幾耳。一曰寶掌法師名。寶掌山在



寶掌冷泉
 十景四

地有山，山出泉，无处无之。此则唐千岁禅师得道处也。泉涌自飞来，甘冽无比，则未知煎茶水记品居第几耳。一曰宝掌法师名。宝掌山在县北十里。

十景五 月泉春诵图说

月泉春诵图说五
 月印川而皆圆此见道语情动而声形轩豁呈露之至不觉
 知有我况春和乎若问泉与月之从违天与其人与难言之
 矣刻于碑在碑上二里其泉随月盈亏




月泉春诵
 十景五



月印川而皆圆，此见道语。情动而声形轩豁呈露之至，不觉知有我也，况春和乎？若问泉与月之从违，天与其人与难言之矣。月泉在县北二里，其泉随月盈亏，上有精舍，祠文公、成公。

十景六 潮溪夜渔图说

潮溪夜渔图说 六
 水云入梦，鸥鹭随家。蓼花枫叶之滩，郭索王徐之窟，其或
 波心点月，群鸟合于鱼丽；有时泽畔篝灯，见鳞浮而雀跃。一
 声霫乃，两岸烟霞，问江上其云谁，宛天涯之故我。潮溪在县
 东二十五里，产鱼蟹。



潮溪夜渔

水云入梦，鸥鹭随家。蓼花枫叶之滩，郭索王徐之窟，其或波心点月，群鸟合于鱼丽；有时泽畔篝灯，见鳞浮而雀跃。一声霫乃，两岸烟霞，问江上其云谁，宛天涯之故我。潮溪在县东二十五里，产鱼蟹。

十景七 南江夕照图说



南江夕照图说

山原陇亩多在江阴，薄暮则霞绮云罗。村疏野旷，趋林之翼
闪烁于残阳；舟子樵夫，烟径中时来野调。一时极目，而万象俱
收，非绘事所能状也。澄潭之网，以江上言耳。在南门外南江
桥，西望原麓，反照如画图中。

南江夕照图说



山原陇亩多在江阴，薄暮则霞绮云罗。村疏野旷，趋林之翼
闪烁于残阳；舟子樵夫，烟径中时来野调。一时极目，而万象俱
收，非绘事所能状也。澄潭之网，以江上言耳。在南门外南江
桥，西望原麓，反照如画图中。

十景八 东岭秋阴图说



東嶺秋陰圖說
 離城不過數十武，徑曲而地高，無塵俗氣。當秋日連陰，但見古木蕭森，群山回合，花含露泫，雁入雲寒。山林而在城市，一奇觀也。嶺在縣東。

离城不过数十武，径曲而地高，无尘俗气。当秋日连阴，但见古木萧森，群山回合，花含露泫，雁入云寒。山林而在城市，一奇观也。岭在县东。


十景九 深袅江源图说

深袅江源圖說
沿波討源文猶如此而水可知浦陽江之入海渾渾沌沌殊難蠡測溯其始才濫觴耳峭壁危崖之下匯為一泓其寒逼人其清若鏡自此眾流進入紆回數十里而帶城南厥勢已沛然矣記曰君子志於本無所不通



讨源,文犹如此,而水可知。浦阳江之入海,浑浑沌沌,殊难蠡测,溯其始才滥觞耳。峭壁危崖之下汇为一泓,其寒逼人,其清若镜。自此众流进入,纡回数十里,而带城南,厥势已沛然矣。记曰:“君子志于本,无所不通。”深袅山在县西三十里,浦阳江之源。

十景十 昭灵仙迹图说



昭靈仙跡圖說
 廟在仙華之麓其仙女云出軒轅亦云烈山氏不可考但稱
 少女峯然祈禱甚靈以故尸祝而俎豆之至今如一日紀勝
 則前人備矣

庙在仙华之麓。其仙女，云“出轩辕”，亦云“烈山氏”，不可考。但称“少女峰”。然祈祷甚灵，以故尸祝而俎豆之，至今如一日。纪胜则前人备矣。

附：

仙华八景图序

明邑人 张应槐

浦江，古扬州地，春秋为东越，五代入金华，其水合于钱塘。谢惠连诗云：“昨发浦阳汭，今宿浙江湄”。越有三江，此其一也。浦在万萃之中，为巨浸之首。县治前障后屏，锦围绣错，壮丽整严，甲于他邑。四面周环夷旷各数十里，层峰叠巘上干青霄，泌沚狂澜同趋大壑，以至悬岩绝磴，曲涧迴流，诸胜不可名状。独以仙华之峭拔，宝掌之廓虚，东岭之嵒峤，月泉之灵应，白石之飘洒，孤塔之崑峨，南江之曼衍，潮溪之逖疏，实为浦最因撮署之。余尝东游泰岳，西至雁门，北过涿鹿，南浮江淮矣。覆载之内，宇宙之广，宁乏名山大川，方之于景，宜不多让。且各景差池星落，而绸缪维系，累累如贯珠其间，若坐、若对、若侍、若列、若隐、若见、若翕、若张；似续而断，似断而续；似分而合，似合而分；耿耿成象，洵域中绮观也。余浦人也，且家仙华之麓，出往即是登临，瑰琦总余长物，顾山川非有私于浦，浦独不靳公之于人，博稽往牒，题咏虽多，摹绘尚缺。因有感于《潇湘八景》之图，而为踵其事，既赓和之，复命工丹镌之，传之四方，如吟域相界，声息相闻，引领以望，竭蹶以趋。即越在千里之外者，披览一过，若辟广厦，登明堂，云门大吕之奏，迭进并陈，耳将听之，目将营之，心将驰之，放饮豪歌，低徊不能去猗欤？休哉斯图也，别为山川树一标帜也。谓仙华与潇湘偕不朽也。按浦阳旧称“八景”，前人申而为十，其实裊山即南江之源，昭灵乃少女之刹，相为形影，奚取剧





出。余故裒其二以绘八。如潇湘、疑冢、青草、汨罗、吊古诸景无垠，独搜八景，要以景在精，不在多。浦自饶佳山水，即一仙华，亦足以例其余，况于八也。《语》云：“人能美地，地不能美人。”余媿不能为地美，欲借地以自美，非敢效颦吴、柳诸君子也。

仙华八景图序

邑令 黎宏道

予剖符得承乏浦阳，人多言浦阳山水清奇，甲于吴越，予忻然爱之。比至浦，见邑治旷衍，逶迤崇山四面环起，且日坐堂皇，山光霞气掩映屏帘，盈盈如坐镜中也。顾予拙才能不逮中庸，戴星出入，拮据不遑，且趾力濡绵，虽多览覓之怀，实苦济胜之具为是。邑中八景，惟仙华一峰曾以缙绅大夫士为予乞灵，故因得瞻拜徘徊，陟巅四望，余皆未逮焉。三阳张公祖至楚，偶以《仙华八景图》示予，且属予序。予览而叹曰：“昔人绘名山为卧游，有以哉，有以哉！美景历历，予屐齿所不跻，乃今披若图，读若说，咏歌昔三君之雅什，即不必躬履厥境，而峦岩苍翠，出没烟云，碧水清泉，鸣琴漱玉，已隐然晴窗砚几间。张公意念深矣。虽然予更有说焉。自昔名贤总维岳降，而山川奇丽，则又往往托名贤之产，而益名公德业文章，清澄止水，而峻插青云，恍与仙华诸佳胜相映带。夫非地灵独钟耶？千秋而下艳浦邑，奇观纒纒不绝，又安知不缘公益重也。不然，怪石香泉出天壤间，何限不得其人，其不湮沦寥落于荒烟草莽之中者几何？太史公有言：高山仰止，景行行止，虽不能至心向往之，则予今日之谓矣。政暇爰弁数语于图。仍按图咏八章，续貂于左。然予旦暮西远，尚须与二三君

子，蹶磴披云，临流览镜。作十日游，不使山灵笑人也。

浦阳十咏

元邑人 柳贯

〔仙华岩雪〕

冰柱浮空晓色濛，海波摇动玉玲珑。
九清内景游氛外，五岳真形太素中。
微月升坛初映鹤，长云连野不惊鸿。
仙姬宴坐瑶池上，催捧蟠桃献木公。

〔白石湫云〕

白石灵山望赞皇，湫潭此复见苍苍。
飘扬直欲凌三际，肤寸犹能雨八荒。
空外金精悬太白，泉中虬影化长黄。
传芭奏罢神絃曲，松盖成阴泽气凉。

〔龙峰孤塔〕

两环日月似飞梭，鳌背棱棱窄堵坡。
朱鸟前头森质巖，苍龙左角见嵯峨。
玉函舍利朝光现，珠斗阑干午影过。
浩劫浮云开万象，宝华杂遯散芬陀。

〔宝掌冷泉〕

一勺曹溪未是甘，刺山容易出飞泉。
消融太古岷峨雪，澄映中秋沆瀣天。
挂树青猿窥洗钵，眠沙白鹿伴安禅。
岩龕无缝身如石，逆数高僧入定年。





〔月泉春诵〕

有盈有泄即寒泉，犹隔庐峰道里千。
岳麓云深藏策处，匡山人老读书年。
松楠叠影清浮几，华树生香晚入筵。
稽首堂中两夫子，六经言远视如天。

〔潮溪夜渔〕

溪水添流到石砭，小家残户占渔商。
蛟龙未解乘云气，鱼鳖安能避泽梁？
两岸栎林藏曲折，一篝松火照微茫。
淮夷固有玳珠颗，往往钩深得夜光。

〔南江夕照〕

千峰不尽夕阳孤，敛翠浮丹入画图。
塔庙旁连山影直，石梁中亘水痕枯。
白鱼在汕将踰尺，红稻登场稍似珠。
玉露金风秋最爽，跳身何用市间壶。

〔东岭秋阴〕

半里官桥出市闾，一团秋色破孱颜。
云开浩荡初疑曙，日出苍凉不见山。
断雁残鸿飞杳杳，绿芜红叶映班班。
去年菊蕊今年发，拾得篱边句子还。

〔深袅江源〕

滥觞初不满瓶盆，百谷浑浑一壑吞。
自此安流输渤澥，放渠高浪蹴崑仑。
出山未适帆樯便，竭潭毋容网罟繁。

谢客题诗曾宿处，孤云落月是何村？

〔昭灵仙迹〕

芝掌中开颢气清，云輶双驾凤凰翎。
因山不启轩辕鼎，化石犹联婺女星。
磴道芳春琪树长，岩扉清昼碧华零。
真仙帝遣司风雨，唤起渊龙听指令。

奉和太常博士柳公浦阳十咏

钱塘 钱惟善

〔仙华岩雪〕

仙华生白夜光澄，五指分明最上层。
冰冻金茎承沆漑，月寒玉筍插觚稜。
麻姑扇盖从空降，少女云輶自此升。
几欲凌空披鹤氅，刚风浩渺兴难乘。

〔白石湫云〕

雾雨深涵白石泓，鱼鳞屋冷气轻清。
中藏异瑞成银瓮，下隐神蛟见白婴。
岩客栽诗春蔼蔼，山灵泽物夜英英。
谁因肺渴鲋寒冽，涧底归来更拾荆。

〔龙峰古塔〕

岿然特立梵王宫，梯级惟容鸟道通。
翠壁云横经劫火，铁簷铃雨落秋风。
高标插汉苍龙左，倒影横江白鹤东。
何日扪萝寻胜迹，不愁千里目难穷。



〔宝掌冷泉〕

清冷寒沁白芙蓉，灵物蜿蜒古有龙。
山见昙华森宝掌，洞藏贝叶殷金钟。
听猿欲访三生石，见鹤还疑五老峰。
赤脚只从泉上去，萧然卧雪看云松。

〔月泉春诵〕

泉在空山月在天，东莱夫子武夷仙。
担簦有客来长白，载酒何人学太元。
心印寒潭同皎洁，书声春雨杂潺湲。
一灯肯借栖松桂，饱听南薰鼓舞弦。

〔潮溪夜渔〕

鱼虾溪产正鲜肥，水没芦花旧石矶。
笊箸候潮秋得计，参差吹月暮忘归。
九渊贝阙疑龙国，一道沓波似鲙琦。
黄帽棹讴回半夜，船头高卧绿蓑衣。

〔南江夕照〕

目尽江南送夕阳，空明直下接鱼梁。
千重云岫连平远，五色霜林映渺茫。
孤鹜倒飞天上下，长虹高卧水中央。
白云红寥多秋思，付与诗翁了醉乡。

〔东岭秋阴〕

青山失色映丹枫，广野平林杳蔼中。
半岭无云时惨淡，尺天不雨亦空濛。
冥冥南向藏元豹，漠漠东开见白鸿。



高处夕佳难揽结，扫除阴翳待雄风。

〔深袅江源〕

深袅渊源万古流，溯洄谁解泛扁舟。
险疑滟潏来巴蜀，高讶崑仑近斗牛。
混混直从开辟有，洋洋未许网罗求。
东行顷过浦阳汭，清咏难追谢守游。

〔昭灵仙迹〕

肌肤冰雪藐神人，此地昭灵迹未陈。
华表鹤归终解语，鼎湖龙起复攀鳞。
雨香宝穡琼田晓，露冷琪花碧涧春。
仙驭时随青鸟去，定陪崑圃宴群真。

浦阳十咏

邑人 吴莱

〔仙华岩雪〕

手倚晨扃一渺漫，山神拥出玉嵬巘。
光侵道者祠星室，迹破樵家斲药坛。
石笋撑空穿宿暝，天机织素挂余寒。
俄然唤醒西南梦，怕作松州徼外看。

〔白石湫云〕

独上南山最上头，朝曦一点便成湫。
岩腰动石风初起，海眼输泉雨欲流。
蜥蜴含珠光照夜，灵隆捲铁黑沉秋。
明当去挟骑龙叟，直到扶桑第几洲。



〔龙峰古塔〕

老眼前头尺五天，真龙角上正攀缘。
规模白马驮经过，想像元鳗护塔眠。
梵呗将回知磬绝，神珠欲陨见灯悬。
何妨宴坐初禅界，螻蚁纷飞即大千。

〔宝掌冷泉〕

乍拨山亭木叶堆，老僧千岁喝岩开。
天从白石云根出，地带青泥雪髓来。
竹影自深斜影月，鱼腥不到半凝苔。
世间梦客知多少，可待金茎露一杯。

〔月泉春诵〕

古木丛中息世喧，先生力学掩溪门。
危弦未绝人须听，蠹简多忘我欲温。
白兔流光分石色，苍龙拥沫验沙痕。
从今更浚源头水，莫待投胶与救浑。

〔潮溪夜渔〕

昨夜寒潮与此通，荒溪常趁百川东。
行依柏树林头月，钓拂芦花屿畔风。
插竹侵沙鱼鳧短，篝灯映草蟹碕空。
太公远矣吾将隐，赤鲤何书在腹中？

〔南江夕照〕

偶出官桥倚落曛，诗家触景漫纷纷。
弹琴在峡惊闻瀑，罨画为溪喜得云。
竹箬晚深樵弛担，莎根秋短牧归群。



道旁更有粉榆社，欲脱蓑衣藉酒醺。

〔东岭秋阴〕

几点晴云著树梢，寒山苍莽类城壕。
鸡豚日落声相接，鹤鹤风凉势自高。
小径残榛分岭脊，平畴净绿带溪毛。
朝来雨足多秋意，井上无人事桔槔。

〔深袅江源〕

半绕山根但一窟，真源凿破杳无涯。
清澄灌或于陵圃，窈窕寻犹博望槎。
积雨冲堤蜗自国，微烟幂渚鹭专沙。
欲行复坐皆云水，只属骚人与钓家。

〔昭灵仙迹〕

一掌嵯峨是玉京，连峰欲向鼎湖倾。
高张黼座龙随下，静拥珠轩虎独行。
白雪松扉双立影，清风药井倒吹声。
长歌为问西王母，却把荷花与送迎。

浦阳八景

明邑人 张应槐

〔仙华岩雪〕

耸壑昂霄挺玉壶，岩容皎洁似仙姑。
瑶林閤郭疑元圃，冰柱吞江映镜湖。
堆絮凝寒驱暑气，飞云如锦点清肤。
丹成少女灵长在，为问轩辕事有无？



〔白石湫云〕

石白云生黑更浓，深秋雷动欲从龙。
随车不用桑林祷，焚魅何如灵泽封。
电闪捲藏金蜥蜴，天空摧出玉芙蓉。
浦阳别有商霖在，居向蓬莱第一峰。

〔龙峰孤塔〕

西来龙教自何年，花雨缤纷塔影圆。
说法堂空频点石，传灯土净欲生莲。
钟敲鹜岭真如现，锡指潮音沙榻眠。
若得慈航离苦海，壮心灰尽此逃禅。

〔宝掌冷泉〕

天削玲珑镇大荒，吟龙先吸冷泉尝。
何来老衲传千岁，携得高峰到上方。
宝掌有珠还的皪，禅心无地不清凉。
却留浩劫间来往，洞口云深日月长。

〔月泉春诵〕

泉自混混月自明，天教泉月象亏盈。
和歌欲借阳春色，起舞先闻弦诵声。
三峡雄源霏玉屑，九霄清露吸金茎。
只今冠盖鸣珂里，稽古宁忘宿昔情。

〔潮溪夜渔〕

溪头谁听浙江潮，夜夜渔歌未寂寥。
沙影月移鸥半觉，芦花风静浪全消。
但凭白鬓堆霜湿，况有青蓑挟雨骄。



知是得鱼持易酒，兴来莫惜隔波招。

〔南江夕照〕

薄暮南江兴欲狂，图来似胜辋川庄。
水声断处啼归鸟，山色迷中见夕阳。
倦足深云难觅径，残花满屐不闻香。
谁能挽日成豪饮，击筑和歌乐未央。

〔东岭秋阴〕

闻道东山是胜游，萧森古道碧云浮。
参天乔木阴疑暮，拂地凉风暑亦秋。
林鸟乍惊槐露滴，征人几讶火星流。
若将此地成河朔，投辖吾当十日留。

浦阳十咏

国朝金华 曹开泰

〔仙华岩雪〕

危岩曾说鼎湖通，芝掌擎天剑倚空。
深窦定留太古雪，寒花又舞不周风。
缟衣漠漠连瀛鸟，玉宇皑皑耸碧穹。
姹女娉婷重到否，欲将往事问龙公。

〔白石湫云〕

夺得灵湫雁宕来，飞流恍惚入天台。
潭深时见孤云起，雨降宁须咒钵催。
出岫无心苔磴滑，微风掠面草花开。
老骊慎勿慵贪睡，好溲甘霖润九垓。



〔龙峰孤塔〕

慈恩古塔旧知名，此亦高标舍利城。
十级长年资镇压，一铃谁听语分明。
矗空倚傍都无有，阅世沧桑久不倾。
安得骑龙飞绝顶，俯看培塿万峰平。

〔宝掌冷泉〕

勺水能飞六月霜，劈开石穴走金浆。
名山要卓高僧锡，甘露先凝选佛场。
半壁寒漪毛发冷，一瓯新茗齿牙香。
游人内热知多少，瓢饮何当满腹尝。

〔月泉春诵〕

名泉岂是昔时泉，白月依然照讲筵。
羸缩已难圭影测，春秋犹喜诵声传。
悟生玉鉴冰壶里，梦绕鹤湖鹿洞边。
二老瓣香知有在，天渊活泼是真詮。

〔潮溪夜渔〕

不学任公把钓钩，不须严濑日披裘。
长溪自有多渔乐，沿夜真堪举网收。
细雨一灯鳧渚静，残星几点蟹庄秋。
更阑江上潮来未，泥饮聊拼歎乃讴。

〔南江夕照〕

江流谁碎碧玻璃，白板桥边落日西。
倒捲林峦千片合，横吞楼阁一城低。
水天客有柔榆感，彩翠人疑罨画溪。



远树又看新月上，渡头鸟雀自争栖。

〔东岭秋阴〕

从古悲秋唤奈何，东山秋色兴偏多。
桥连谷口横松箨，风送岩腰护薜萝。
淡淡绿烟人欲醉，萧萧乌柏雁初过。
此间可有鸣阴鹤，倘附同声一和歌。

〔深袅江源〕


南江直达浙江遥，发轫涓涓浪未骄。
峡东两涯澄白练，峰迴九曲插丹霄。
胚胎不是清于镜，澎湃安能汇作潮。
后海先河都若此，清看沟浍涸终朝。

〔昭灵仙迹〕

铸鼎荆山事岂真，更传帝子是仙人。
药炉直溯洪濛代，画栋犹藏混沌春。
湘女宓妃皆后辈，云輶雾驾感前因。
龙钟凡骨如堪换，乞取黄芽养谷神。



2. 輿 图



都鄙图说

《薛志》：区一县为七乡。自置县时始，乡以统都，都以统图，历朝虽互有增減，而其名至今不改也。城以内为东、西、南、北隅。外其乡，曰德政，名尊仁里；曰通化，名湖塘里；曰嘉兴，名仙峰里；曰灵泉，名登高里；曰感德，名仁义里；曰政内，名新田里；曰兴贤，名登高里。是为七乡，而都、图属焉。隶德政乡者，一都至五都也；隶通化者，六都至十二都也；隶嘉兴者，十三都至十六都也；十七至十九隶灵泉；二十至二十三隶感德；政内则二十四至二十七隶焉；兴贤则二十八至三十隶焉。自内及外，由隅而都，图则系之。其铺，则在通化者曰五路岭，曰横溪，曰白枣，曰

沙溪,曰太阳岭;在兴贤,曰杨塘;在感德,曰白马,曰郑街;在灵泉,曰甘里。此通县都鄙之大凡也。地著于斯,主其故常,不见外事。民生其间,可谓和乐者矣。

3. 乡 井

《嘉靖浦江志略》:

唐分七乡,隶四隅及三十都。隅城中之地也。都,郊野之地也。详见下文。

德政乡 名尊仁里,隶四隅、一都之五都。

通化乡 名湖塘里,隶六都之十二都。

嘉兴乡 名仙峰里,隶十三都之十六都。

灵泉乡 名登高里,隶十七都之十九都。

感德乡 名仁义里,隶二十都之二十三都。

政内乡 名新田里,隶二十四都之二十七都。

兴贤乡 亦名登高里,隶二十八都之三十都。

大明洪武十有四年,定图籍隶于隅都。民以一百一十户为一图,共图一百六十有六。每图设里长一人,十年一役。嘉靖元年,并图籍于隅都,人户消乏,是年大造黄册,并图仅一百有二。登耗之故,重可感矣。

东隅 在县城东一里。旧一图,今同。

南隅 在县城南一里。旧一图,今同。

西隅 在县城西一里。旧一图,今同。

北隅 在县城北一里。旧一图,今同。

一都 去县东一十里。旧九图,今五图。



- 二都 去县西一十五里。旧七图,今三图。
三都 去县西二十五里。旧四图,今三图。
四都 去县北五里。旧四图,今二图。
五都 去县西五里。旧四图,今二图。
六都 去县南二十里。旧五图,今三图。
七都 去县南三十里。旧四图,今三图。
八都 去县南三十五里。旧四图,今二图。
九都 去县南五十里。旧四图,今三图。
十都 去县南五十里。旧四图,今二图。
十一都 县南五十里。旧五图,今三图。
十二都 去县南三十里。旧三图,今一图。
十三都 去县南三十里。旧九图,今六图。
十四都 去县南二十里。旧七图,今四图。
十五都 去县南一十五里。旧九图,今五图。
十六都 去县南一十里。旧十二图,今八图。
十七都 去县东二十里。旧八图,今五图。
十八都 去县东二十五里。旧八图,今五图。
十九都 去县东二十五里。旧五图,今四图。
二十都 去县东四十里。旧六图,今四图。
二十一都 去县东四十五里。旧四图,今二图。
二十二都 去县东四十里。旧七图,今五图。
二十三都 去县东三十里。旧四图,今三图。
二十四都 去县西北三十五里。旧五图,今三图。
二十五都 去县西北三十里。旧五图,今三图。





二十六都 去县西北五十里。旧八图,今六图。

二十七都 去县东北六十里。旧二图,今一图。

二十八都 去县东北七十里。旧三图,今一图。

二十九都 去县东北九十里。旧二图,今一图。

三十都 去县东北一百里。旧一图,今同。

都分十保,县共三十都。每都设都长一人。每都各分十保,设保长一人,专管田地、山塘、古今流水、类姓等项印信文册,防民争夺。

画六区,每区设粮长三人,管收税粮。

东 区 管南隅、西隅、三都、五都、十六都税粮。

东南区 管十三都、十四都、十五都、十七都、十八都税粮。

东北区 管十九都、二十都、二十一都、二十二都、二十三都、二十八都税粮。

西 区 管七都、八都、九都、十都、十一都、十二都税粮。

西南区 管东隅、北隅、一都、二都、四都、二十四都税粮。

西北区 管二十五都、二十六都、二十七都、二十九都、三十都税粮。

浦江地表百里,以县统乡,以乡统都,以都统图。如身使臂,臂使指,势联属而民用一矣。不但是也。保分矣,而经界之法不紊;区画矣,而税粮之责有归。分画之详,维持之密,即古者井邑、丘甸之遗制也,是故详书于志,使守土者谨焉,则于临民施政,谅有弛张缓急之序矣。